

CHINESE - JAPANESE LIBRARY  
HARVARD - YENCHING INSTITUTE  
AT HARVARD UNIVERSITY  
NOV 1 6 1941

T9299/8125(33)

強藩年代門七

唐末藩鎮篇四

強藩年代門八

唐末藩鎮篇五

強藩年代門九

五季藩鎮篇

強藩年代門十

五季藩鎮篇

元末

學海君道部卷之九十五

世系類

強藩年代 七

唐末藩鎮篇 四

揚州三帥章

高駢幽州人祖崇文元和初為邠寧節度使京西都統封南平郡王  
謚曰威武父承明神策虞戾世在禁軍駢頗讀書好談古今兩軍官  
官多譽之累遷右神策都虞戾党項叛將禁兵萬人戍長武屢有功  
遷秦州防禦使咸通中南詔入寇以駢為安南都護討之南詔平置  
靜海軍於安南以駢為節度使入為金吾大將軍乾符初南詔復入  
寇以駢為西川節度使駢至成都發兵擊破之徙鎮荆南又徙鎮浙

哈佛大學漢和  
圖書館珍藏印

西乾符己亥正月駢遣將分道擊黃巢破之黃巢寇廣南駢請自將  
擊之十月以駢爲淮南節度使克鹽鐵轉運使廣明庚子三月以駢  
爲諸道行營都統時諸軍皆至淮南駢恐分其功乃奏賊不日當平  
不煩諸道兵請悉遣歸朝廷許之賊遂長驅渡江駢畏怯不復出兵  
十二月賊入長安信宗走興元中和辛丑正月帝幸成都遣使趣駢  
討賊駢終不出九月駢檄鎮海周寶入援寶治舟師以俟之怪其久  
不行慕容或曰高公有并吞江東之志聲云入援未必非圖我也會  
駢使人約寶留面會泗州議軍事寶辭疾不往由是遂爲深仇駢留  
東塘百餘日詔屢趣之駢上表託以寶將爲後患復罷兵還府壬寅  
正月罷駢都統七月罷駢鹽鐵轉運使駢既失兵柄又解利權攘袂  
大詬上表自訟言辭不遜詔切責之駢臣節旣虧自是貢賦遂絕初

駢好神仙有方士呂用之坐妖黨亡命歸駢補以軍職頗言公私利  
病駢信任之用之欲專權常厚賂駢左右使伺駢動靜駢不之寤少  
有異議者輒爲所陷光啟丁未四月駢遣都將畢師鐸將兵屯高郵  
備秦宗權師鐸與用之有隙疑懼不自安謀於腹心皆勸師鐸起兵  
誅用之師鐸乃引兵至廣陵遣孫約詣宣州乞師於觀察使秦彥許  
迎彥爲帥彥遣兵三千助攻羅城克之用之亾走駢命撤備與師鐸  
相見師鐸分兵守諸門搜捕用之親黨悉誅之迎駢入道院并收其  
親黨十餘人幽之九月秦彥與畢師鐸爲楊行密所攻出師屢敗疑  
駢爲厭勝乃殺駢及并其子弟甥姪無少長皆歿同坎瘞之駢據淮  
南凡八年

綱目乾符六年己亥冬十月以高駢爲淮南節度使廣明元年

庚子

春三月以高駢爲諸道行營都統中和元年辛丑夏五月高駢移檄討賊出屯東塘秋九月高駢罷兵還府光啟三年丁未夏四月淮南都將畢師鐸等發兵討呂用之克楊州用之亾走師鐸執高駢而幽之秋九月秦彥殺高駢

尹氏曰前書高駢出屯東塘已見其緩於勤王有次且不進之意然猶未遽絕之至於自夏迄秋既不進討又罷兵還府則是擁兵自固坐視朝廷傾覆其罪不可勝誅矣此綱目所以大書絕之也

卮言曰黃巢之亂高駢劉巨容力足以滅賊而自圖富貴縱賊不擊至於長安陷沒三子蒙塵而二鎮晏然不出一旅其罪可勝誅哉夫巨盜群雄凶亂僭竊猶無足責也乃兩人爲朝廷之

大臣國家所倚重而不臣若此其可追天罰乎彼固幸天下之變可得坐據方鎮而不知不義之取亦有力者所必爭也則向之自利者乃其所以自害歟史稱劉巨容得方士之術田令孜求之不與而滅其族高駢信方士之言畢師起兵誅之而卒滅其家兩人者罪同而禍亦同也

秦彥徐州人本名立爲卒隸徐州乾符中盜繫獄破械亡命因改名彥乃聚徒百人殺下邳令取其資入黃巢軍巢兵敗於淮南彥詣高駢降駢累奏授和州刺史中和壬寅冬宣歙觀察使竇滂病彥使其子將兵三千襲宣州逐滂而代之朝廷因以彥爲宣歙觀察使光啟丙午四月畢師鐸之攻高駢也遣其屬孫豹與其子詣宣州乞師於彥且許以克城之日迎彥爲帥彥遣其將秦稠將兵三千至楊子助

師鐸攻廣陵南門不克又攻羅城東南隅城幾陷者數四呂用之敗走高駢署師鐸爲節度副使秦稠以宣軍千人分守使宅及諸倉庫駢牒請解所任以師鐸兼判府事師鐸遣孫約至宣城趣彥過江或說師鐸曰僕射卿者舉兵蓋以用之輩奸邪暴橫高令公坐自聾瞶不能區理故順衆心爲一方去害今用之旣敗軍府廓然僕射宜復奉高公而佐之但總其兵權以號令誰敢不服用之乃淮南一叛將耳移書所在立可梟擒如此外有推奉之名內得兼并之實雖朝廷聞之亦無虧臣節使高公聰明必知內愧如其不悛乃枕上肉耳柰何以此功業付之它人豈惟受制於人終恐自相魚肉前日秦稠先守倉庫其相疑已可見且秦司空爲節度使廬州壽州其肯爲之下乎僕見戰攻之端未窮已豈惟淮南之人肝腦塗地竊恐僕射功名名成敗未可知也不若及今亟止秦司空勿使過江彼若粗識安危必不敢輕進就使他日責我以負約猶不失爲高氏忠臣也師鐸大以爲不然明日以告鄭漢章漢章曰此智士也散求之其人畏禍不敢復出駢遷家出居南第師鐸以甲士百人爲衛其實囚之也五月甲午彥將宣歙兵三萬餘人乘竹筏松江而下趙暉邀擊於上元殺溺大半丙午彥入廣陵自稱權知淮南節度使乃以畢師鐸爲行軍司馬補池州刺史趙鐸爲宣歙觀察使戊戌楊行密帥諸軍抵廣陵城下爲八寨以守之彥閉城自守遣秦稠出戰敗歿士卒死者什七八月彥悉出城甲兵萬二千人遣畢師鐸鄭漢章將之陳於城西行密伏精兵自將千人衝其陳兵始交行密陽不勝而走廣陵兵追之伏兵四起俘斬殆盡自是秦彥不復言出師矣九月彥殺高駢十月

彥遣鄭漢章將步騎五千出擊張神劍高霸寨破之神劍奔高郵霸  
奔海陵楊行密圍廣陵且半年彥師鐸大小數十戰多不利城中無  
食草根木實皆盡宣軍掠人詣肆賣之驅縛屠割流血滿市部將張  
審威帥麾下登城啟關納外兵守者皆不鬪而潰先是彥師鐸信重  
妖尼奉仙至是問計奉仙曰走爲上策乃奔東塘行密入城自稱淮  
南留後十一月秦宗權遣孫儒等與行密爭揚州彥師鐸復引兵與  
之合衆皆爲儒所奪裨將唐宏知其必及禍恐并歿乃誣告彥等潛  
召汴軍文德戊申正月儒殺彥師鐸及鄭漢章

綱目乾化三年丁未夏五月宣州觀察使秦彥入揚州廬州刺史楊  
行密引兵攻之冬十月楊行密克揚州文德元年戊申春正月孫儒  
殺秦彥

孫儒河南人以趨卞橫里中隸忠武軍爲決勝指揮使與劉建鋒馬  
殷等戍蔡州拒黃巢節度使及秦宗權叛以蔡州降黃巢儒等皆屬  
焉光啟乙巳春黃巢已平秦宗權僭號寇掠鄰道六月遣儒攻東都  
留守李罕之棄城西保澗池儒遂陷東都據之月餘焚掠而去丙午  
十二月宗權遣儒將兵攻陷鄭州刺史李璠奔大梁儒進陷河陽留  
後諸葛仲方奔大梁儒自稱節度使丁未四月秦宗權爲朱全忠所  
敗儒亦棄河陽而去時秦彥入揚州楊行密引兵攻之十月楊行密  
克廣陵秦彥出奔行密自稱淮南留後秦宗權遣其弟宗衡將兵萬  
人度淮與行密爭揚州以儒爲副十一月辛未抵廣陵城西秦彥與  
畢師鐸至東塘將渡江趨宣州宗衡召之乃引兵還與宗衡合未幾  
宗權召宗衡還蔡拒朱全忠儒知宗權勢不能久稱疾不行宗衡屢

促之儒怒甲戌與宗衡飲酒坐中手刃之傳首於全忠儒分兵掠鄰  
州未幾衆至數萬以城下乏食與彥師鐸襲高郵鎮遏使張神劍帥  
麾下二百人逃歸揚州丙戌孫儒屠高郵楊行密恐儒乘勝取海陵  
壬寅命高勣帥其兵民悉歸府城凡數萬戶文德戊申二月朱全忠  
奏以楊行密爲淮南留後四月壬午儒襲揚州克之行密出走儒自  
稱淮南節度使行密將奔海陵袁襲勸歸廬州再爲進取之計從之  
龍紀己酉六月孫儒攻廬州蔡儔以州降之十一月朱全忠遣龐師  
古將兵自潁上趨淮南擊儒十二月戊寅儒自廣陵引兵渡江壬午  
逐田頽取常州以劉建鋒守之儒還廣陵建鋒又逐成及取潤州大  
順庚戌二月汴將龐師古等渡淮聲言救楊行密攻下天長高郵引  
兵深入淮南與儒戰於陵亭師古兵敗而還楊行密遣其將馬敬言

將兵襲據潤州田頽敗劉建鋒於武進頽屯潤州六月儒求好於朱  
全忠表爲淮南節度使不幾全忠殺其使者遂復爲仇敵八月丙寅  
儒攻潤州九月行密以其將張行周爲常州制置使閏月儒遣劉建  
鋒攻拔常州殺行周遂圍蘇州十二月儒拔蘇州殺李友安仁義等  
聞之焚潤州廬舍夜遁儒使沈粲守蘇州又遣其將歸傳道守潤州  
是時民死於兵者不知其幾矣辛亥正月儒盡舉淮蔡之兵濟江自潤州轉戰而南

田頽安仁義屢敗退楊行密城戍皆墜風奔潰儒將李從立奄至宣  
州東溪行密使其將臺濠屯溪西從立引儒前軍至溧水行密使李  
神福拒之神福陽退以示怯儒不設備神福夜帥精兵襲之俘斬千  
人四月楊行密遣其將劉威朱延壽將兵三萬擊儒於黃池五月大  
水諸宮皆沒乃還揚州使其將康晔據和州安景思據滁州行密遣



李神福攻之康晔降安景思走七月朱全忠遣使與行密約共攻儒  
儒恃其兵彊欲先滅行密後敵全忠移牒藩鎮數行密全忠之罪且  
曰俟平宣汴當引兵入朝除君側之惡於是悉焚揚州廬舍盡驅丁  
壯及婦女渡江殺老弱以克食八月儒自蘇州出屯廣德行密引兵  
拒之儒圍其寨行密將李簡帥百餘人力戰破寨拔行密出之十二  
月儒焚掠蘇常引兵逼宣州錢鏐復遣兵據蘇州儒屢破行密之兵  
旌旗輜重百餘里行求救於錢鏐鏐以兵食助之大順壬子二月  
儒圍宣州初劉建鋒爲儒守常州將兵從儒擊行密甘露鎮使陳可  
言帥部兵千人據常州行密將張訓引兵襲可言殺之遂取常州行  
密別將又取潤州五月行密屢敗儒兵破其廣德營張訓屯安吉斷  
其糧道儒食盡士卒大疫遣劉建鋒馬殷分兵掠諸縣六月行密聞  
儒疾瘡戊寅縱兵擊之會大雨晦冥儒軍大敗安仁義破儒五十餘  
寨田頔擒儒於陳斬之傳首京師儒衆多降於行密劉建鋒馬殷收  
餘衆七千南走洪州行密帥衆歸揚州先是揚州富庶甲天下時人  
稱揚一益二及經秦畢孫楊兵火之餘江淮之間東西千里掃地盡  
矣

綱目光啟二年丁未冬十一月秦宗權遣孫儒攻揚州屠高郵文德  
元年戊申夏四月孫儒襲揚州陷之大順二年辛亥春正月孫儒攻宣  
州景福元年壬子夏六月楊行密擊孫儒斬之

天台胡氏曰孫儒以十倍之衆攻行密其智勇亦無以大相過  
而卒斃於行密者儒專務殺掠人心不附又無根本所以敗也  
庖言曰孫儒之兵所向無前而欲與朱全忠楊行密爲敵亦有

姦雄之才然在所焚掠能取而不能守棄揚州以爭宣州殘常潤以資敵國又有劉建鋒馬殷爲之將而任用乖方緩急無所得力此其所以敗也雖然高駢爲將暴虐爲臣不忠而秦彥等殺之秦彥等貪利忘害殘民以逞而孫儒殺之孫儒累年劫掠驅民鋒鏑而楊行密殺之蓋若天假手云

### 江淮諸帥章

孫端和州賊帥也中和癸卯高駢遣梁續知和州續以端窺伺和州已久不如因而與之以責其效駢強之旣行果爲端所敗及歸和州遂陷於端端自稱和州刺史光啟丙午四月楊行密悉發廬州兵以攻高駢復借兵於端端以兵數千人赴之丁未五月宣州觀察使秦彥入揚州殺高駢行密引兵攻之十月行密克揚州秦宗權遣孫儒攻之戊申四月孫儒襲揚州陷之行密遂圍宣州遣使說端及上元張雄將兵助之爲趙鍾所敗辛亥五月孫儒使其將康晔據和州楊行密遣李神福攻降之端凡據和州九年

卮言曰孫端之據和州通鑑不載而見於考異述妖亂志所云端之失和州亦不載但云孫儒遣將據和州楊行密攻克之夫和旣爲孫儒所據則孫端之降或奔可知也今亦系之此章

馮敬章上蔡賊帥也光啟丁未冬陷蘄州甲寅六月楊行密遣朱延壽救黃州敬章邀擊淮南軍延壽攻蘄州不克丙辰五月延壽奄至蘄州圍其城大將賈公鐸方獵不得還休兵林中命勇士二人衣羊皮夜入延壽所掠羊群潛入城約夜半開門舉火爲應復衣皮反公鐸如期引兵至城南門中火舉力戰突圍而入延壽驚曰吾常

恐其潰圍而出反潰圍而入如此城安可猝拔乃白行密求軍中與公鐸有舊者持誓書金帛往說之許以昏柴再用請行臨城與語爲陳利害數日公鐸及敬章請降以敬章爲左都押牙公鐸爲右監門衛將軍延壽遂進拔光州敬章凡據蘄州十年

張雄徐州人初爲感化牙將光啟丙午十月雄得罪於節度使時溥聚衆三百走渡江襲蘇州據之雄自稱刺史稍聚兵至五萬戰艦千餘自號天成軍丁未三月鎮海軍亂節度使周寶奔常州聞淮南六合鎮遏使徐約兵精誘之使擊蘇州四月甲辰朔約逐雄雄帥其衆逃入海辛未雄帥衆自海沂江屯於東塘遣其將趙暉入據上元五月甲午秦彥將宣歙兵三萬餘人乘竹筏沿江而下暉邀擊於上元殺溺大半彥入廣陵自稱淮南留後八月秦彥爲楊行密所攻以雄

兵強與得其用以僕射告身授雄以尚書告身三通授裨將馮弘鐸等廣陵人競以珠玉金繒詣雄軍質食雄軍既富不復肯戰未幾復助楊行密及彥敗出奔東塘欲趨宣州而雄不納趙暉據上元會周寶敗浙西潰卒多歸之衆至數萬暉遂自驕大治南朝臺城而居之服用奢僭雄在東塘暉不與通問雄沂江而上暉以兵塞其中流雄怒十一月戊午攻上元拔之暉奔當塗未至爲其下所殺餘衆降雄悉坑之大順庚戌冬置昇州於上元縣以雄爲刺史癸丑七月卒凡八年

綱目大順元年庚戌十二月復置昇州

馮弘鐸與張雄同里人初與雄皆爲感化節度使時溥牙將弘鐸爲吏辱雄爲辨數并見疑於溥弘鐸遂從雄聚衆渡江取蘇州未幾失

之文取昇州雄卒弘鐸代之爲刺史朝廷更名昇州曰武寧軍以弘鐸爲節度使弘鐸介居宣揚之間常不自安然自恃樓舡之彊不事兩道寧國節度使田頔欲圖之募弘鐸工人造戰艦工人曰馮公遠求堅木故其船堪久用今此無之頔曰第爲之吾止須一用耳天福壬戌五月弘鐸馮暉顏建說弘鐸先擊頔弘鐸從之帥衆南上聲言攻洪州實襲宣州也楊行密使人止之不從頔帥舟師逆擊于曷山大破之弘鐸收餘衆沿江將入海楊行密恐其爲後患遣使說弘鐸聽命至東塘行密自往迎之署爲節度副使以李福神爲昇州刺史弘鐸據昇州凡十年

綱目天復二年夏四月昇州刺史馮弘鐸襲宣州敗走楊行密取昇州

徐約曹州人初隸高駢帳下爲淮南六合鎮遏使光啟丁未三月張雄據蘇州時周寶已爲薛朗所逐奔常州聞約兵精誘之使擊蘇州四月約入蘇州雄逃入海詔以約爲刺史己酉四月吳越錢鏐拔蘇州約亾入海而歿凡三年

薛朗初爲鎮海度支催勘使光啟丁未三月節度使周寶募親軍千人號後樓兵稟給倍於鎮海軍鎮海軍皆怨而後樓兵浸驕不可制寶溺於聲色不親政事築羅城十二建東第人苦其役寶與僚屬宴後樓有言鎮海軍怨望者寶曰亂則殺人朗以其言告所善鎮海軍劉浩戒之使戢士卒浩曰惟反可以免死耳是夕寶醉方寢浩帥其黨作亂攻府舍而焚之寶驚起徒跣叩芙蓉門呼後樓兵後樓兵亦反矣寶帥家人步走出青陽門遂奔常州浩殺諸僚佐迎

推

爲留後十二月錢鏐命阮結等進攻潤州丙申克之劉浩走擒薛朗以歸

天台胡氏曰劉浩逐周寶奉薛朗而敗又自是而後楊行密孫儒之兵迭爭常潤二州之民歿於兵荒其存者什無二三矣

### 淮南三叛將章

田頽廬州合肥人略通書傳沈果有大志與楊行密同里約爲兄弟應州募屯邊遷王將行密據廬州頽謀爲多秦彥之入揚州也趙錕代之爲宣歙觀察使行密逐秦彥取揚州未幾孫儒又襲揚州克之行密走還廬州畏儒之逼帥兵攻趙錕於宣州錕兵敗出東溪乘暴流以逸阻水解甲謂追騎不能及頽乘輕舸追擒之龍紀已酉六月行密入宣州詔以宣歙爲寧國軍以行密爲節度使行密表頽爲馬

### 爲吳蜀之老可與事天子哉

安仁義沙陀人初爲大同李昌國將以過奔河陽人秦宗權軍中宗權遣其弟宗衡渡淮與楊行密爭揚州仁義屬焉孫儒殺宗衡附於全忠仁義降於行密行密喜悉以騎兵委之列於田頽之上兩人名冠軍中儒詔書仁義通行以疑行密待益厚署行軍副使宗福壬子孫儒圍宣州仁義從行密破斬之行密帥衆歸揚州表仁義爲潤州刺史進團練使累遷檢校太保田頽之與行密絕也仁義與之連和同舉兵襲常州行密使徐溫擊敗之仁義還潤州行密使王茂章攻之不克行密復使徐溫將兵會之仁義勇決得士心茂章攻之踰年不克楊行密使謂之曰汝之功吾不忘也能束身自歸當以汝爲行軍副使但不掌兵耳仁義不從茂章爲地入地遂克之仁義舉

族登樓衆不敢逼先是攻城諸將見仁義輒罵之惟李德誠不然至是仁義召德誠登樓謂曰汝有禮吾以爲汝功且以愛妾贈之德誠掖之而下并其子斬於廣陵市

綱目天祐二年丑春正月楊行密克潤州殺安仁義

天台胡氏曰田頽朱延壽安仁義淮南諸將中之鎗鎗者也二叛逆術不足以病楊行密暮年之餘相次禽殄行密未易才也卮言曰田頽安仁義均之叛楊行密而綱目一書斬一書殺若有輕重之詞者惡始亂也夫頽等爲楊氏將而叛之洵有罪矣然楊氏亦非忠於唐者觀頽等所自負亦欲各自爲雄不相下耳其志去謀疎自底滅亾固無足怪比之反逆則有間焉

江西諸帥

鍾傳高安人乾符戊戌春王仙芝寇掠江西傳聚蠻僚依山爲堡衆至萬人自稱高安鎮撫使仙芝陷撫州而不能守傳入據之詔卽以爲刺史壬寅二月傳又逐江西觀察使高茂勣據洪州朝廷以湖南觀察使閔勗本江西牙將故復置鎮南軍使勗領之若傳不受代令最因而討之勗辭不行七月以傳爲江西觀察使傳旣去撫州南城人危全諷復據之又遣其弟仔倡據信州丁巳八月傳欲討吉州刺史周琲琲帥其衆奔廣陵戊午七月以傳爲鎮南節度使兼侍中天復辛酉十二月傳將兵圍撫州刺史危全諷時天火燒其城士民謹驚諸將請急攻之傳曰乘人之危非人也乃祝曰全諷之罪無爲害民火尋止全諷聞之謝罪聽命以女妻傳子匡時傳少時嘗獵醉遇虎與鬪虎搏其肩而傳亦持虎腰不置旁人共殺虎乃將免旣貴侮

之嘗戒諸子曰士處世貴智謀勿效吾暴虎也天祐丙寅四年卒

鍾匡時傳子也初傳以養子延規為江州刺史傳卒軍中立匡時為

留後延規恨不得立遣使降淮南楊渥遣其將秦裴將兵擊匡時七

月裴至洪州軍于蓼洲軍諸將請阻水立寨裴不從匡時果遣其將

劉楚據之諸將以咎裴裴曰匡時驍將獨楚一人耳若帥眾守城不

可猝拔吾固以要害誘致之耳未幾裴破寨執楚遂洪州饒州刺史

唐寶請降九月裴拔洪州虜匡時五千人楊渥自兼鎮南節度使以

裴為洪州制置使楊氏遂兼有江西之地

綱目中和二年壬寅秋七月以鍾傳為江西觀察使天復元年辛酉十

二月江西節度使鍾傳取撫州天祐三年丙寅夏四月鎮南節度使鍾

傳卒秋九月楊渥取洪州

右鍾氏據江西凡二十五年

卮言曰唐末僭亂諸藩鎮之將卒其材勇者多養以為子始固

藉其力以折衝守禦及其亡國敗家亦多由於養子

危全諷撫州南城人中和辛丑鍾傳之去撫州也全諷復據之自稱

刺史又遣其弟仔倡據信州天復辛酉十二月俛率兵圍撫州天火

燒其城士民謹驚諸將請急攻之傳曰乘人之危非仁也全諷聞之

謝罪聽命以女女傳子匡時天佑三年丙寅四月傳卒匡時立為留

後全諷曰聽鍾郎為節度三年我自取之及楊渥攻洪州執匡時以

歸全諷不敢救潛謀攻渥會渥亡將王茂章過州請曰聞公欲大舉

願見諸將才否全諷蒐眾十萬邀茂章觀之對由揚州有士三等公

眾正當其下盍更益之全諷不能答丁卯十二月淮南兵攻信州危

仔倡求救於吳越吳越王鏐遣兵攻淮南甘露鎮以救之己巳七月全諷自稱鎮南節度使謀復鍾氏故地帥撫信袁吉之兵號十萬攻洪州淮南守兵纔千人將吏皆懼節度使劉威密遣使告急於廣兵圍高安以助全諷徐溫遣將周本潭不敢進請兵於楚楚王殷遣亘數十里庚辰周本隔溪布陳先使救之全諷在象牙潭營柵臨溪乘其半濟縱兵擊之全諷兵大潰自羸兵當敵全諷兵涉溪追之本斷其歸路擒將士五千人乘勝克袁相蹂籍溺水死者甚衆本分兵州刺史陶雅遣兵襲饒信州刺史危州執刺史彭彥章進攻吉州歛是米志誠等敗死攻於上高吉州刺仔倡請降饒州刺史唐寶棄城淮南以張景思知信州遣兵送之危仔倡聞兵至奔吳越危全誨至

廣陵淮南諸將議曰昔先王政趙錕全諷屢饒給吾乃釋之資給甚厚八月處州附淮南於是江西之地盡入于楊氏全諷凡據撫州二十九年

綱目梁開平三年<sub>己巳</sub>秋七月淮南盡取江西地

盧光稠南康人與譚全播同里光稠狀貌雄偉無他材能而全播勇敢有識略然全播常竒光稠爲人唐末群盜起南方全播謂光稠曰天下洶洶此真吾等之時無徒守此貧賤爲也乃相與聚兵爲盜衆推全播爲主全播曰諸君豈徒爲賊乎而欲成功也若欲成當得良帥盧公堂堂直若等主也衆陽諾之全播怒拔劍擊木三斬之曰不從令者如此木衆懼乃立光稠爲帥光敬乙巳正月光稠陷虔州自稱刺史以全播爲謀主



天福壬戌十二月光稠攻嶺南陷韶州使其子延昌守之進圍潮州  
清海劉隱發兵擊走之乘勝進攻韶州隱弟陟以爲延昌有虔州之  
援未可遽取隱不從進圍韶州會江漲餽運不繼光稠自虔州引兵  
救之譚全播伏精兵萬人於山谷以羸弱挑戰大破隱于城南隱奔  
還全播悉以功讓諸將光稠益賢之天祐丁卯四月朱全忠篡唐稱  
梁帝時江南嶺表悉爲吳與南漢分據而光稠獨以虔韶二州請命  
于梁願通道路輸貢賦梁主爲置百勝軍以光稠爲防禦使兼五嶺  
開通使開平乙巳正月梁建鎮南軍於虔州以光稠爲留後鎮南軍舊制於  
洪州時已爲淮南所有十二月卒

盧延昌光稠子初爲韶州刺史光稠疾病欲以位授譚全播全播不  
受光稠卒延昌自韶州來奔喪全播立而事之吳遣使拜延昌虔州  
刺史延昌受之亦因楚王殷密通表於梁曰我受淮南官以緩其謀  
耳必爲朝廷經略江西梁主乃以延昌爲鎮南留後延昌表其將廖  
爽爲韶州刺史吳淮南判官嚴可求請置制置使於新淦縣遣兵戍  
之以圖虔州每代輒潛益其兵虔人不之覺也乾化辛未十二月  
延昌遊獵無度指揮使黎球救之而自立將殺全播稱疾請老乃免  
梁以球爲虔州防禦使未幾球卒牙將李彥圖代知州事全播益懼  
遂稱疾篤彥圖疑之使人覘其動靜全播應覘爲狀以自免劉巖聞  
全播病發兵攻韶州破之刺史廖爽奔楚

右盧氏據虔州凡二世共二十七年

譚全播南康人詳見前條梁乾化壬戌十二月李彥圖卒州人奉全播知  
州事相率詣全播第叩門請之全播乃起遣使請命于梁梁主以以

全播爲百勝防禦使防韶二州節度開通使

言使之開通道路南達交廣也

全播治

虔州七年有善政貞明戊寅二月吳遣將王祺將洪撫袁吉之兵擊

全播奄至虔州城下虔人始知之虔城險固吳軍攻之久不下棋病

卒吳以劉信代之全播求救於吳越閩楚吳越遣兵攻信州楚遣兵

屯雲都以救之吳越兵圍信州不克解去九月劉信急攻虔州斬首

數千級不能克使人說全播取質納賂而還徐溫大怒杖信使者信

子英彥典親兵溫授兵三千曰汝父據上游之地將十倍之衆不能

下一城是反也汝可以此兵往與父同反又使指揮使朱景瑜與之

俱曰全播守卒皆農夫飢窘踰年妻子在外重圍既解相賀而去聞

大兵且往必皆逃遁全播所守者空城耳往必克之信聞之大懼十

一月引兵還擊虔州先鋒始至虔兵皆潰全播奔雲都追執之吳以

全播爲右威將軍領百勝節度使先是吳越常自虔州入貢至是道

絕全播凡據虔州七年

綱目貞明四年

戊寅

冬十一月吳取虔州

卮言曰唐末諸藩謀臣裨將戍主帥而伐之又殄滅其家者多

矣譚全播始謀起事而立盧光稠卒無二心且以功讓諸將何

忠誠也辭顧託而不居奉嗣子而事之庶幾諸葛武侯之心事

乎及州軍再辭而全播能自免於禍患亦其誠有足動人者矣

其後不得已而爲衆所推請命中朝不失事大之禮數年善政

深得治國之經而敗於吳者強弱之勢殊也若譚全播者豈特

鐵中錚錚哉而孰謂亂世無人

右自洪州以下皆并於吳

兩浙諸帥章

劉漢宏兗州人初爲都統節度使王鐸牙將乾符己亥十月黃巢陷朗州其將尚讓進逼江陵王鐸留漢宏守江陵自帥衆趣襄陽云欲會劉巨容之師鐸既去漢宏大掠江陵焚蕩殆盡士民逃竄山谷會大雪僵尸滿野後旬餘賊乃至漢宏帥其衆北歸爲群盜後數日賊乃至廣明庚子十一月王鐸罷廣明庚子五月漢宏之黨浸盛侵掠米兗甲子徵東方諸道兵討之六月漢宏南掠甲光七月辛酉請降戊辰以爲宿州刺史十一月漢宏怨朝廷賞薄有望言會浙東觀察使柳滔得罪乃以漢宏爲浙東觀察使十二月黃巢入長安帝走興元中和辛丑正月帝至成都漢宏貢輸踵蹕而西帝悅漢宏既有七州志侈大輒曰天下大亂卯金刀非吾尚誰哉鷓鴣謀諸廷命斫樹怒曰吾能斬白蛇何畏一木

壬寅八月漢宏遣弟漢宥及馬步都虞侯辛約將兵二萬營于西陵謀兼并浙西杭州刺史董昌遣都知兵馬使錢鏐拒之壬子鏐乘霧夜濟江襲其營大破之所殺殆盡漢宥辛約皆走十月漢宏又遣登高鎮將王鎮將兵七萬屯西陵錢鏐復濟江襲擊大破之斬獲萬計得漢宏補諸將官僞敕二百餘道鎮奔諸賢癸卯三月漢宏分兵屯黃嶺巖下鎮將史棄貞女鎮將楊元宗漢宏以精兵屯諸賢鏐又擊破之漢宏走冬十月漢宏將十餘萬衆出西陵將擊董昌錢鏐濟江迎戰大破之漢宏易服持鱸刀而遁明日漢宏收餘衆四萬又戰鏐又破之斬其弟漢容及將辛約十二月升浙東爲義勝軍以漢宏爲節度使甲辰三月婺州人王鎮執刺史黃碣降于錢鏐漢宏遣其將

婁賈綬鎮而代之浦陽鎮將蔣瓌召鏐兵共攻婺州擒賈而還光啟  
丙午十月董昌謂錢鏐曰汝能取越州吾以杭州授汝鏐曰然不取  
終爲後患十一月丙戌錢鏐克越州漢宏奔台州十二月台州刺史  
請漢宏執送董昌斬之昌徙鎮越州以鏐知杭州事漢宏凡據越州  
六年

綱目乾符六年

巳亥

冬十月黃巢將尚讓逼江陵王鐸走守將劉漢

宏作亂廣明元年

庚子

夏五月劉漢宏寇宋兗徵諸道兵討之秋七

月劉漢宏降中和二年

壬寅

秋七月劉漢宏寇杭州董昌擊破之光

啟二年

丙午

十一月董昌取越州

卮言曰觀綱目所書劉漢宏一巨寇耳然不系之亂賊而系之  
強藩篇者黃巢之亂群雄並起方伯大臣尚多跋扈况於裨將  
乘時弄兵乎漢宏以蟻衆據浙東而與董昌錢鏐爭衡卒并於  
錢氏則亦錢氏之驅除者也四方戰爭浙東何能獨安漢宏不  
爲亂始天下豈少漢宏之徒哉

董昌詳篡逆門

陳儒初爲饒州刺史光啟丁未十一月陷衢州丙辰十月卒

卮言曰通鑑云饒州刺史陳儒陷衢州不言何時爲饒州也按  
饒州至衢七百餘里非可兼并則是先刺饒州耳而九國志云  
陳儒同安賊也或嘗據饒州而失之至此又陷衢州耶

陳岌儒弟也儒卒岌代之光化戊午十一月岌請降於楊行密錢鏐  
使顧全武討之

右陳氏據衢州兄弟共十二年

陳璋初爲錢鏐將鏐以爲衢州制置使天復壬戌八月兩浙軍亂徐  
綰等召宣州田頔頔引兵赴之築壘絕往來之道鏐患之募有能奪  
其地者賞以州璋將卒三百出城奮擊遂奪其地鏐卽以爲衢州刺  
史十二月丁丑據溫州田頔使人招之道出衢州璋聽其往還錢鏐  
由是恨璋甲子十二月錢鏐遣衢州羅城使葉讓殺璋事泄璋斬讓  
而叛降于楊行密乙丑十月璋引兵會淮南將陶雅攻拔婺州楊行  
密以璋爲衢婺副招討使璋攻暨陽兩浙將方習敗之習進攻婺州  
丙寅二月璋聞陶雅歸歙州乃自婺州退保衢州兩浙將方永珍等  
取婺州進攻衢州八月兩浙兵圍衢州城璋告急於淮南時行密已  
卒子渥襲位遣周本將兵迎璋本至衢州浙人解圍陳于城下璋帥  
衆歸于本兩浙兵取衢州本引兵還璋據衢州凡五年

李師悅

人爲湖州刺史乾寧丙辰十月師悅求旌節詔置忠國  
軍於湖州以師悅爲節度使使告身旌節者未入境而師悅卒

李彥徽師悅子初爲棉州刺史致仕師悅卒楊行密表徽知州事丁  
巳八月彥徽欲以州附楊於楊行密其衆不從彥徽奔廣陵都指揮  
使沈攸以州歸錢鏐

高彥

人初錢鏐取湖州以彥爲刺史天福壬戌八月錢鏐如衣  
錦軍命徐綰先還杭州綰遂與許再思作亂彥聞難遣其子謂將兵  
入援至靈隱常山綰伏兵擊殺之天祐丙寅十一月卒

高澧彥子彥卒澧代之禮性凶忍嘗召州吏議曰吾欲盡殺百姓可  
吏曰如此租賦何從出當擇可殺者殺之耳梁開平巳巳十月時  
澄糾民爲兵有言其咨怨者澧悉集民兵于開元寺給云犒享入則

殺之死者踰半在外者覺之縱火作亂澧閉城大索凡殺三千人吳越王鏐欲誅之戊辰澧以州叛附于淮南舉兵焚義和臨平鎮鏐命指揮使錢鏐討之庚午二月澧求救於吳吳常州刺史李簡等將兵應之湖州將盛師友沈行思閉城不內澧帥麾下五千人奔吳以鏐巡湖州以鏐爲刺史

右高氏據湖州凡九年

陳晟初爲餘杭鎮使中和甲辰冬逐睦州刺史柳超自領州事朝廷因命爲刺史庚申冬卒

陳詢晟弟也晟卒詢自稱刺史附於錢鏐癸亥七月詢叛鏐舉兵攻蘭溪鏐遣指揮使方永珍擊之却之甲子十月行密又遣指揮使楊習攻睦州乙丑正月兩浙兵圍詢于睦州楊行密遣陶稚將兵救之虜錢鎰王球會衢睦兵攻婺州錢鏐遣兵救之稚克婺州十二月詢不能守睦州奔于廣陵陶稚入據其城丙寅正月稚還歙州錢鏐復取睦州

右陳氏據睦州兄弟共二十三年

杜雄臨海賊也中和辛丑八月雄陷台州

朱褒永嘉賊也中和辛丑十月陷溫州壬戌五月卒

朱敖褒兄褒卒敖自稱刺史乙丑十二月爲其將丁章所逐敖奔福州朱氏兄弟據溫州凡二十五年

卮言曰薛史云朱褒溫州人兄弟皆爲本州牙校刺史胡璠卒

子誕據郡褒逼誕而代之與通鑑稍異

又曰唐末藩鎮竊據州郡有傳之子者有傳之弟者有傳之從

子者未有弟死而兄繼之者也朱敖張璠以兄承弟蓋亦異矣  
丁章初爲温州將壬戌十二月逐刺史朱敖據温州田頔遣使招之  
道出衢州陳璋聽其往還錢鏐由是恨璋癸亥四月章爲木工李彥  
所殺

張惠初爲温州將丁章死惠據温州乙丑八月爲盧約所敗惠奔福  
州

盧約遂昌賊也中和辛丑十一月陷虔州自稱刺史乙丑八月約使  
其弟佶攻陷温州張惠奔福州

盧佶約弟乙丑攻陷温州據之梁開平丁卯三月吳王錢鏐遣其子  
傅僚等討之佶將水軍拒之於青澳傅瓘曰佶之精兵盡在於此不  
可與戰乃自安固捨舟問道襲温州戊午温州潰擒佶斬之吳王鏐

### 西川陳氏章

陳敬瑄許州人中常侍田令孜之兄也

令孜本姓陳咸通中隨義父入內侍省爲宦者遂冒姓田

敬瑄少賤爲餅師崔安潛鎮昌令孜爲敬瑄求兵馬使安潛不許敬  
瑄令孜籍得繇左神策軍數歲累遷至左金吾衛大將軍檢校尚書  
右僕射廣明庚子三月田令孜見關東羣盜日熾陰爲幸蜀之計奏  
以敬瑄及其腹心左神策大將軍楊師立牛勗羅元杲鎮三川上令  
四人擊毬賭三川敬瑄得第一籌卽以爲西川節度使安潛敬瑄素

微賤報至蜀蜀人皆驚莫知爲誰有青城妖人乘其聲勢帥其黨詐稱陳僕射馬步使瞿大夫覺其妄執而誅之六月庚寅至成都十一月黃巢入長安帝出奔十二月至壻水詔敬瑄等諭以京城不守幸與元若賊勢猶盛將幸成都宜豫爲備敬瑄聞車駕出幸遣步騎三千奉迎表請幸成都時從兵浸多與元儲侍不豐田令孜亦勸上上從之中和辛丑正月車駕發興元敬瑄以扈從之人驕縱難制有內園小兒先至成都遊於行宮笑曰入言西川是蠻今日觀之亦不惡敬瑄執而杖殺之由是衆皆肅然敬瑄迎謁於鹿頭關丁丑車駕至成都館於府舍三月加敬瑄同平章事封梁國公敬瑄奏遣左黃頭軍使李鋌將兵擊黃巢癸卯九月加敬瑄兼中書令進爵潁川王檢校太師光啟乙巳三月車駕還京師令孜自兼兩池榷鹽使而徙

河中王重榮鎮泰寧重榮不從表數令孜十罪令孜遂結朱玫令昌符使攻河中李克用救之進逼京畿帝奔鳳翔令孜劫帝如寶雞玫昌符追逼車駕帝復走入興元百官罪狀令孜請誅之令孜自知不爲天下所容自除西川監軍往依敬瑄丁未二月流令孜於端州令孜竟不行十二月王建攻成都不克退屯漢州戊申二月帝還長安尋崩昭宗卽位時敬瑄與王建相攻貢賦中絕顧彥朗表請赦建罪移敬瑄他鎮以靖兩川乃以韋昭度爲西川節度使徵敬瑄爲龍武統軍敬瑄拒命治兵完城以備昭度詔削敬瑄官爵昭度將武道兵討之三年不能克饋運不繼大順庚戌三月復敬瑄官爵詔顧彥朗王建罷兵建表敬瑄令孜罪不可赦願畢命以圖成功乃逐昭度還攻成都克之自稱西川留後景福癸丑四月建屢請殺敬瑄及田



令攷朝廷不許建使人告敬瑄謀作亂殺之新津又告令攷通鳳翔書下獄死使判官馮涓草表奏之曰開押出虎孔宣父不責他人當路斬蛇孫叔敖盖非利已專殺不行於閩外先機恐失於殼中

胡氏曰公道在上其下服焉治世也清議在下其上惡焉亂世也清議者公道鬱而後有公道者清議達而後行是故賞罰者人主制世御俗之柄不可以失焉者也令攷敗亂國家敬瑄敗亂藩鎮置于重典誰不謂然朝廷既不得而治之會王建有請當亟下詔獎其為國督奸之志而許之豈不賢於建專殺而不請哉而猶且不許倒殺之柄昭宗宜斷而不斷之過也

綱目廣明元年庚子春三月以陳敬瑄為西川節度使文德元年戊申

冬十二月削陳敬瑄官爵大順二年辛亥春二月復陳敬瑄官爵景

福二年癸丑夏四月王建殺陳敬瑄田令攷

東川諸帥章

楊師立初事田令攷為其腹心廣明庚子三月田令攷奏以陳敬瑄

鎮西川詳前條而以師立為東川節度使癸卯六月加同平章事甲辰

正月師立以陳敬瑄兄弟權寵之盛心不能平敬瑄之遣高仁厚討

韓秀昇也語之曰成功而還當奏天子以東川相賞師立聞之怒曰

彼此列藩而遽以我強土許人是無天地也田令攷恐其為亂因其

不發兵防遏徵師立為右僕射二月師立得詔書怒不受代殺官告

使及監軍使舉兵以討陳敬瑄為名大將有諫者輒殺之進屯涪城

遣其將郝勳襲綿州不克三月甲子師立移檄行在百官及諸道將

吏士庶陳敬瑄十罪自言集本道將士八州壇丁共十五萬人長驅

問罪詔削師立官爵以高仁厚為東川留後將兵五千討之六月仁厚圍梓州不下乃為書射城中遣其將士數曰鄭君雄帥眾大譟入府師立自殺君雄挈其首出降師立據梓州凡五年

綱目中和四年甲辰春二月東川節度使楊師立舉兵反三月詔以

高仁厚為留後舉兵討之夏六月東川將吏斬楊師立以降

高仁厚

史公其系

初為西川陳敬瑄押牙中和壬寅十一月陳敬瑄以楊

行遷等討阡能久無功乃以仁厚為都招討指揮使五百人往代之

未發前一日得阡能謀者縱使歸塞明日仁厚招諸寨兵相繼皆集

賊爭棄兵請降拜如摧山仁厚萬歲大譟突入府中師立自殺君雄

挈其首出降仁厚獻其首及妻子於行在以仁厚為東川節度使光

啟丙午三月陳敬瑄疑仁厚欲去之遂州刺史鄭君立起兵攻陷漢

州進成都敬瑄遣其將李順之逆戰君立敗死敬瑄又發維茂羌軍

擊仁厚殺之

綱目中和四年

甲辰

夏六月東川將吏斬楊師立以降詔以高仁厚

為節度使光啟二年丙午春三月陳敬瑄殺東川節度使高仁厚

顧彥朗豐縣人為右衛大將軍與弟彥暉並為天德軍小校共事蔡

京以兄弟有封侯相每厚禮之使子贈賚稍稍進秩黃巢入長安彥

朗從諸軍討之及收復京師以功累遷右衛大將軍光啟丁未正月

以彥朗為東川節度使初西川王建與彥朗俱在神策軍同討財建

既據閬州彥朗畏其侵軼數遣使問饋以軍食建由是不犯東川

十一月陳敬瑄惡彥朗與王建相親恐其合兵圖已謀於田令孜令

孜曰建吾子也乃遣使以書召之建大喜詣梓州見彥朗曰十軍阿

父見召當徃省之因見陳太師求一大州足矣乃留其家於梓州帥兵二千西至鹿頭門敬瑄悔悔亟遣人止之且增修守備建怒破關而進遂拔漢州進拔德陽敬瑄使遣讓之對曰十軍阿父召我來及門而拒之重為顧公所疑進退無歸矣彦朗以其弟彥暉為漢州刺史發兵助建急攻成都三日不克而退還屯漢州文德戊申五月陳敬瑄方與王建相攻貢賦中絕建使周庠草表請討敬瑄以贖罪因求邛州彥朗亦表請赦建罪移敬瑄它鎮以靖兩川上方憤藩鎮跋扈欲以威制之會得彥朗建表乃以韋昭度鎮西川徵敬瑄為龍武統軍敬瑄田令孜聞韋昭度將至治兵完城以拒之十一月詔以韋昭度為行營招討使楊守亮副之彥朗為行軍司馬大順辛亥十月韋昭度討陳敬瑄三年不能克饋運不繼朝議欲息兵三月制復敬瑄官爵令彥朗王建各帥眾歸鎮九月卒

綱目大順二年辛亥春三月復陳敬瑄官爵詔顧彥朗王建罷兵

卮言曰顧彥朗之鎮東川綱目不書惟此一見耳

顧彥暉彥朗弟也彥朗卒軍中推彥暉知留後十二月詔以彥暉為檢校司空東川節度使遣中使宋道弼賜旌節楊守亮使楊守厚囚道弼奪旌節發兵攻梓州彥暉求救於王建建遣其將華洪王宗弼等救之而密謂諸將曰爾等破賊彥暉必犒師汝曹於行營報宴固而執之無煩再舉洪等破守厚奏之彥暉具犒禮諸將報宴宗弼以建謀告之彥暉乃以疾辭彥暉既與王建有隙鳳翔李茂貞欲撫之使從已奏請更賜彥暉節 景福癸丑二月詔以彥暉為東川節度使乾寧乙卯五月王行瑜李茂貞韓建舉兵犯闕帝如石門鎮九月

王建遣兵赴援屯綿州十二月建奏彥暉不發兵赴難而略奪輜重請興兵討之建將華洪大破東川兵於楸林俘斬數萬拔楸林寨別將王宗弼爲彥暉所擒彥暉畜以爲子丁巳二月建遣華洪等將兵五萬攻東川四月詔以李洵爲宣諭使和解王建及彥暉建不聽詔命使張琳守成都自將兵五萬攻東川與彥暉五十餘戰九月癸酉朔建圍梓州蜀州刺史周德權言於建曰公與彥暉爭東州三年東川羣盜多據州縣彥暉懦而無謀欲爲偷安之計皆暗以厚利恃其救援故堅守不下今若遣人諭賊帥以禍福來者賞之以官不服者威之以兵則彼之所恃反爲我用矣建從之彥暉勢益孤十月建攻梓州益急庚申彥暉聚其宗族及假子兵飲遣王宗弼自歸子建酒酣命其假子瑤殺已及同飲者然後自殺建入梓州兵尚七萬餘人

綱目大順二年辛亥冬十二月楊守亮執中使寇梓州王建遣兵救之乾寧二年乙巳冬十二月王建遣兵擊東川四年丁巳冬十月王建克梓州顧彥暉自殺

右顧氏據東川兄弟共九年

彭州楊氏章

楊晟初隸鳳翔軍節度使李昌符畏其勇欲殺之周摘使亾去隸神策軍爲指揮使乾寧乙巳十二月田令孜遣朱玫李昌符攻王重榮李克用救之進逼京畿帝奔鳳翔晟等護從丙午正月田令孜劫帝如寶雞朱玫李昌符追逼乘輿敗晟兵于潘氏乃置感義軍於興鳳二州以晟爲檢校司徒節度使守散關二月車駕至興元五月玫立嗣襄王煜於長安遣王行瑜追乘輿晟戰敗却棄散關走行瑜進

屯鳳州七月行瑜進攻興州晟棄鎮走襲文州逐刺史據之成龍茂  
州戊申十二月王建攻成都田令孜以晟已之故將也假威戎軍  
節度使守彭州王建攻彭州陳敬瑄遣眉州刺史山行章將兵五萬  
壁新繁以救之龍紀已酉正月王建大破山行章於新繁行章僅以  
身免晟懼徙屯三交景福壬子正月楊守亮楊復恭走興元與楊守  
亮等舉兵拒命晟與守亮約攻王建二月丁丑晟出兵掠新繁漢州  
之境使其將呂蕘將兵二千會楊守厚攻梓州建遣其將李簡擊蕘  
斬之建遣王宗裕華洪等將兵五萬攻彭州晟逆戰而敗守亮遣其  
將符昭救之徑趨成都建亟召華洪還昭引兵宵遁晟又遣楊守貞  
等書使攻東川以解彭州之圍守貞等從之至則皆敗走遂克彭州  
八月李茂貞攻長興元守亮等景福壬子四月王建圍彭州久不下

民皆窟匿山谷諸寨日出俘掠有軍士王先成者說王宗侑請置招  
安寨禁諸寨洩虜三日民出山赴寨如歸市甲寅五月王建攻彭州  
城中人相食彭州內外都指揮使趙章出降王先成請築龍尾道屬  
於女墻丙子西川兵登城晟猶帥眾力戰刀子都虞候王茂權斬之

王建攻彭州踰兩  
期而後克亦憊矣

綱目昭宗龍紀元年配春正月王建攻彭州陳敬瑄遣兵救之大

景福元年壬子夏六月王建圍彭州乾寧元年甲寅夏五月王建克彭

州殺楊晟

范暉建州人初黃巢轉掠福建建州人陳巖聚眾數千保鄉里號九  
龍軍觀察使鄭鑑表以自代甲辰冬以巖為福建觀察使巖為治有  
威惠閩人安之辛亥冬巖疾病遣使召泉州刺史王潮欲授以軍政

未至而卒暉巖妻弟也時為都將諷將士推已為留後發兵拒潮暉  
驕侈失衆心潮使其弟審知等將兵攻福州久不下癸丑五月暉求  
救於越州董昌昌故與陳巖婚姻發温台婺州兵五千救之審知等  
欲罷兵潮不許乃急攻之城申食盡暉知不能守夜以印授監軍奔  
城走援兵亦還王潮遂取福州暉亡抵泂海都為一士所殺暉據福州二年

### 桂州劉士政章

劉士政初為安州指揮使乾寧乙卯冬安州防禦使家晟與朱全忠  
親吏蔣玄暉有隙恐及禍乃與士政及兵馬監押陳可璠將兵三千  
襲桂州殺經略使周元靜而代之自安州遠襲桂州而克之者江湘  
城邑荒殘守兵單弱道無邀截之  
患桂人不意其至  
遂殺其帥而代之晟醉侮可璠手刃之推士政知軍府事可璠

自為副使詔即以士政為經略使庚申賜桂管軍號曰靜江陞士政

為節度使是年十月士政聞湖南馬殷悉平嶺北大懼遣陳可璠屯

全義嶺在桂州東北  
一百五十里以備之殷遣使修好於士政可璠拒之殷遣其

將秦彥暉李瓊等將兵七千擊士政湖南軍至全義士政又遣指揮

使王建武屯秦城在桂林城北八十里  
相傳為秦戍五嶺地可璠掠縣民耕牛以犒軍縣

民怨之請為湖南鄉導曰此西南有小徑距秦城纔五十里僅通單

騎彥暉遣李瓊將騎六十步兵三百襲秦城中宵踰垣而入擒王建

武比明復還紿之以練造可璠壁下示之可璠猶未之信斬其首投

壁中桂人震恐瓊因勒兵擊之擒可璠降其將士二千皆殺之自秦

城以南二十餘壁皆望風奔潰遂圍桂州數日士政出降桂宜巖象

柳五州皆降於湖南士政據桂州凡五年綱目止書馬殷取桂州而  
不書士政據桂之由太略

涇州張氏章

張鈞初為涇原節度使昭宗大順辛亥冬賜涇原軍號曰彰義

張鐔鈞之兄甲寅二月鈞卒表鐔為留後詔因以為節度使乙卯七

月王行瑜之亂以鐔為西面招討使與諸道共討之十二月卒

張璉鐔子鐔卒以璉權知留後詔因以為節度使丁巳七月李茂貞

拒命以璉為鳳翔西北行營招討使討之如同平章事卒

張珂璉弟璉卒以珂知留後已未正月朱全忠表珂為節度使亦以結之

九月以鳳翔李茂貞兼領彰義張氏凡再世四帥鎮涇十年而屬鳳

翔 卮言曰張氏父子兄弟世著勤王之功本非強藩以其世據涇川故系之此門

鄜州李茂勳章

李茂勳茂貞從弟為保大鄜州節度使天復辛酉朱全忠舉兵欲誅

宦官韓全誨劫帝如鳳翔全忠圍鳳翔壬戌七月茂勳將兵屯三原

救李茂貞全忠遣其將康懷貞等擊之茂勳遁去十一月癸卯朔茂

勳帥眾萬餘人救鳳翔屯於城北阪上與城中舉烽相應甲辰全忠

遣其將孔勅等將兵乘虛襲鄜坊壬子拔坊州甲申大雪汴軍冒之

夕進抵鄜州城下鄜人不為備汴軍入城城中兵尚八千人格鬪至

午鄜人始敗擒留守李繼瑯勅撫存茂勳及將士之家按堵無擾茂

勳聞之引兵遁去重戰輕防此茂勳所以敗也厚撫其家此茂勳所以歸心於全忠也十二月茂勳遣

使請隆於朱全忠更名周彝

綱目天復二年壬戌冬十一月保大節度使李茂勳引兵救鳳翔朱

全忠遣兵取鄜坊茂勳降

劉氏曰華州之救李克用書入棧此但書救鳳翔何誅意也茂

勲此舉非心乎王室者為茂貞而已矣

邠州

李繼徽本姓楊名崇本李茂貞以為假子為靜難州節度使辛酉十一月朱全忠攻邠州繼徽請降復姓名楊崇本全忠質其妻於河中令崇本仍鎮邠州崇本妻美全忠私焉既而歸之崇本怒使謂李茂貞曰唐室將滅父何忍坐視之乎癸亥十月遂相與連兵侵通京畿復姓名為李繼徽全忠恐其復有劫遷之謀乃引兵屯河中甲子五月全忠還大梁六月繼徽與李茂貞王建傳檄合兵以討朱全忠全忠遣朱友裕擊之全忠引兵自大梁西討邠岐兵竟不出乙丑九月繼徽以鳳翔保塞彰義之兵攻夏州保大匡國節度使劉知後邀擊坊州兵敗之乘勝攻郿延等五州下之西軍自是不振丁卯四月全

忠篡唐稱帝國號梁繼徽稱臣奉貞戊辰冬岐王李茂貞所署保

節度使胡敬璋卒繼徽以其將劉萬子代鎮延州萬子暴虐失眾心且謀貳於梁繼徽使延州牙將李延實攻殺之遂據延州已巳梁將

劉知後攻延州延實降梁主命知俊乘勝取邠州知俊雞之乃召還是冬知俊叛梁奔岐岐王以為彰義涇州節度使與繼徽俱附於岐

綱目天復二年癸亥冬十月李茂貞李繼徽舉兵逼京畿天佑元年甲子夏六月李茂貞王建李繼徽合兵討朱全忠全忠拒之河中

劉氏曰茂貞繼徽再逼京畿皆罪人也而得書討惡全忠耳

李彥魯繼徽子甲戌冬繼徽為彥魯所毒而死彥魯自為留後乙亥正月繼徽假子保衡殺彥魯自稱靜難留後舉邠寧二州附梁梁王以保衡為感化節度使以霍彥威為靜難節度使岐王遣劉知俊圍



邠州霍彥威固守拒之半歲不克知俊奔蜀

學海君道部卷之九十七

世系類

強藩年代九

五季藩鎮篇

卮言曰五代之君皆從藩鎮得國若朱溫李嗣源李從珂石敬瑭郭威均以逆取則爲其臣者尤而效之曷足怪焉惟李存勗劉知遠得國差正而歷年未久功德無聞君臣之道蓋汶汶也故自唐末迄于宋初凡強藩悍將據土擁兵或附或叛僥倖反覆者固不可以禮義論亦豈得與治世之順逆者同日而道哉故總系之此篇

梁鎮將章

朱友謙初名簡以卒隸澠池鎮有罪亡去爲盜石濠三鄉之間商旅行路皆苦之久之去爲陝州軍校唐光化己未六月陝州節度使王珙與其弟珂爭河中戰敗其牙將李璠等與簡謀共殺珙推璠爲留後璠立簡復殺之自稱留後附於朱全忠全忠表簡爲保義節度使全忠西攻李茂貞往來過陝簡奉事尤謹因請曰僕本無功而富貴至此元帥之力也且幸同姓願更名預於子侄全忠益憐之乃更其名友謙錄以爲子丁卯四月全忠稱帝國號梁友謙徙鎮河中累遷中書令封冀王壬申六月友珪弑梁主而自立諸宿將多憤怒告哀使至河中友謙泣曰先帝數十年開基創基業前日變起宮掖聲聞甚惡吾備位藩鎮心竊耻之友珪加友謙侍中以詔書自辨且徵之友謙謂使者曰所立者爲誰先帝晏駕不以理吾且至洛陽問罪何以徵爲友珪遣康懷貞等將兵五萬擊友謙友謙遂以河中附於晉以求救晉王克用自將出澤潞以救之梁兵乃解去友謙身自至猗氏謝晉王從者數十人撤武備詣晉王帳拜之爲舅晉王夜置酒張樂友謙大醉晉王留宿帳中友謙安寢鼾息自如晉王視之顧左右曰冀王雖甚貴然恨其臂短耳明且復置酒而罷癸酉二月均王友貞起兵討友珪誅之友貞立於大梁更名瑱遣使招撫友謙友謙復稱藩而不絕晉也庚辰四月友謙襲取同州以其子令德爲留後表求節鉞不許乃始絕梁而附晉癸未三月晉王存勗稱皇帝于魏州國號唐晉王以墨制除令德忠武節度使六月唐主入大梁梁主瑱自殺遂滅梁十一月友謙入朝賜姓名曰李繼麟命魏王繼岌以兄事之加兼尚書令繼麟自恃與唐主故舊且有功唐主待之厚苦諸

伶宦求丐無厭遂拒不與同光乙酉九月唐主遣魏王繼岌及郭崇  
韜將兵伐蜀繼麟閱兵遣其子令德將之以從景進與宦官譖之曰  
繼麟聞大軍起以爲討已故驚懼閱兵自衛又曰崇韜與河中陰謀  
內外相應繼麟聞之懼欲身入朝以自明其所親止之繼麟曰郭侍  
中功高於我今事勢將危吾得見主上面陳至誠則讒人獲罪矣丙  
戌正月癸亥繼麟入朝魏王繼岌以皇后教殺郭崇韜於蜀唐主下  
詔暴其罪并殺其諸子睦王存乂崇韜之婿也宦官言其怨望唐王  
殺之景進言河中有告變言李繼麟與郭崇韜謀反崇韜死又與  
存乂通謀宦官因共勸唐主速除之乃徙繼麟爲義成節度使是夜  
遣朱守殷以兵圍其第驅繼麟出徽安門外殺之復其姓名曰朱友  
謙友謙二子令德爲武信節度使令錫爲忠武節度使詔魏王繼岌

誅令德於遂州鄭州刺史王思同誅令錫於許州河陽節度使

竒誅其家人於河中紹竒至其家友謙妻張氏帥家人二百餘口見  
紹竒曰朱氏宗族當死願無濫及平人乃別其婢僕百人以其族百  
口就刑友謙舊將史武等七人時爲刺史皆坐罪誅時洛中諸軍饑  
窘妄爲謠言伶宦采之以聞於帝故朱友謙郭崇韜皆及於禍

綱目壬申

樂乾  
化二

夏六月梁郢王友珪弒其主晃而自立秋七月梁

遣兵擊河中節度使朱友謙降晉癸酉春二月梁均王友貞起兵  
討賊友珪伏誅友貞立於大梁友謙復歸梁癸未

唐同  
光二

秋八月唐

主入大梁唐遂滅梁唐朱友謙入朝丙戌春正月唐護國軍節度  
使李繼麟入朝唐殺其睦王存乂及李繼麟

楊師厚隸州斤溝人少事河陽李罕之後罕之降晉選其麾下勁卒

百人獻于晉王師厚在籍中入晉無所知名後以罪奔於朱全忠全忠以爲宣武軍押牙累功至齊州刺史全忠攻趙匡疑於襄陽師厚爲先鋒擊走之進攻荆南匡疑弟匡明亦奔成都全忠以師厚爲山南東道節度使加同平章事丁卯四月梁王全忠稱帝更名晁西攻岐北攻晉以師厚兼潞州四面行營招討使己巳六月劉知俊以同州降岐復以師厚爲四路行營招討使帥劉鄩等討之師厚等至華州知俊奔岐師厚至長安岐兵已據城師厚以奇兵並南山急自西門入遂克之師厚既西而襄陽軍亂推李洪爲留後以附于蜀梁主乃以師厚爲鎮國節度使岐王遣劉知俊將兵攻靈夏晉周德威攻晉州以應知俊梁主遣師厚將兵擊破之進抵晉州晉兵解圍遁去更以師厚爲保義節度使徙鎮宣義辛未秋梁主欲攻趙以師厚爲都招討使將兵屯刑州趙王鎔甚懼會晉王于承天軍同謀拒梁梁主自將擊趙師厚從之梁軍大敗梁主還東都師厚還屯魏州壬申六月梁郢王友珪弑梁主晃而自立七月天雄節度使羅周翰幼弱軍府皆決於牙將潘晏師厚在魏州久欲圖之憚梁祖威嚴不敢發及友珪篡弑師厚館於銅臺驛潘晏入謁執而殺之引兵入牙城據位視事友珪制以師厚爲天雄節度使徙周翰鎮宣義自梁祖與晉戰河北師厚嘗爲招討使悉領梁之勁兵至是師厚遂逐其帥而稍矜倨難制故時魏恃牙兵其帥得以屈彊羅紹威時牙兵盡死魏勢孤始爲梁所制師厚已得魏仍復選軍中驍勇置銀槍効節都數千人給賜優厚欲以復故時牙兵之盛師厚既得魏博之衆又兼都招討使宿衛勁兵多在麾下諸鎮兵皆得調發威權甚重心輕友珪遇

事往往專行不顧友珪患之發詔召之云有北邊軍機欲與卿面議師厚將行其腹心皆諫曰往必不測師厚曰吾二十年不負朱家今若不行則見疑而生事吾知其爲人雖往如我何乃師精兵萬餘人度河趣洛陽友珪大懼師厚至都門留兵於外十餘人入見友珪喜其言遜詞以悅之賜與鉅萬遣還十一月趙將王德明將兵三萬掠武城至于臨清攻宗城下之師厚伏兵唐店邀擊大破之斬首五千餘級友珪旣得志遽爲荒淫內外憤怒駙馬都尉趙巖奉使至大梁均王友貞密與之謀誅友珪巖曰凡事成敗在招討楊令公耳得其一言諭禁軍吾事立辨時梁重兵皆在楊師厚之手友貞乃遣腹心又勲名爲衆所服故巖云然馬慎交之魏州說師厚曰郢王慕弒人望屬在大梁公若因此而成之此不世之功也且許事成之日賜犒軍錢五十萬緡師厚與將佐

謀之曰方郢王弒逆吾不能卽討今君臣之分已定無故改圖可乎或曰郢王親弒君父賊也均王舉兵復讐義也奉義討賊何君臣之有彼若一朝破賊公將何以自處乎師厚曰吾幾誤計乃遣其將王舜賢至洛陽陰與侍衛親軍都將袁象先謀遣都虞侯朱漢賓將兵屯滑州爲外應象先帥禁兵入宮攻友珪友珪死均王嗣位於大梁加師厚兼中書令封鄴王賜詔不名事無巨細必咨而後行師厚晚年矜功恃衆擅割財賦梁主雖外加尊禮內實忌之乙亥二月卒梁主私於宮中受賀租庸使趙巖言於梁主曰魏博爲唐腹心之蠹二百餘年不能除去者以其地廣兵強之故也羅紹威楊師厚據之朝廷皆不能制陛下不乘此時爲之計安知來者不爲師厚乎宜分六鎮州爲兩鎮以弱其權末帝從之於是魏軍亂以魏博降晉梁失魏

博自此始

綱目壬申

梁乾化二

夏六月梁郢王友珪弑其主晃而自立秋七月梁

以楊師厚爲天雄節度使冬十月梁楊師厚入朝乙亥

梁貞明二

春二

月梁分天雄爲兩鎮

尹氏曰友珪弑逆已五閱月師厚據大鎮擁強兵不能仗義致討乃反委身朝賊故特筆書之以著其黨惡之罪也

賀德倫少爲滑州牙將梁祖兼領宣義德倫從之征伐以功累遷平廬軍節度使貞明乙亥二月楊師厚卒梁主分天雄爲兩鎮以德倫爲天雄節度使置昭德軍於相州割澶衛二州隸焉以張筠爲節度使分魏州將士府庫之半於相州恐魏人不服遣劉鄩將兵六萬泗河以討鎮定爲名實張荆勢以脅之魏兵皆父子相承數百年族如

盤結不願分徙德倫屢趣之應行者皆嗟怨連營聚哭鄩屯南樂先遣王彥章將五百騎入魏屯金波亭魏兵相與謀曰朝廷忌吾軍府強盛欲設策使之殘破耳吾六州歷代藩鎮兵未嘗遠出河門一旦骨肉流離生不如死是夕軍亂縱火大掠圍金波亭王彥章斬關而走詰旦亂兵入牙城殺德倫之親兵五百人劫德倫置樓上有效節軍校張彥者自帥其黨拔白刃止標掠梁主遣供奉官扈異撫諭魏軍許張彥以刺史彥請復相澶衛三州如舊制異還言張彥易與但遣劉鄩加兵立當傳首梁由是不許但主優詔答之使者再返彥裂詔書抵於地戟手南向詬朝廷謂德倫曰天子愚暗聽人穿鼻今我兵甲雖疆苟無外援不能獨立宜投疑於晉遂逼德倫以書求援於晉晉王得書命李存審進據臨清劉鄩屯洹水德倫復遣使告急于

晉晉王引大軍至臨清按兵不進德倫遣判官司空頽犒軍密言於  
晉王曰除亂當除根因言張彥凶狡之狀勸晉王先除之晉王進屯  
永濟彥迎謁遂斬之及其黨七人餘無所問晉王至魏德倫帥將吏  
請晉王入府城慰勞既入德倫上印節請王兼領天雄軍晉王固辭  
德倫再拜曰今寇敵密邇謂劉劼之兵逼魏也軍城新有大變人心未安德倫  
心腹紀綱所殺殆盡刑孤勢弱安能統眾一旦生事恐負大恩王乃  
受之德倫帥將吏拜賀晉王承制以德倫為大同節度使遣之鎮德  
倫至晉陽張承業留之後為承業所殺

綱目乙亥

梁貞明二

春二月梁分天雄為兩鎮夏四月魏人降晉

尹氏曰魏博安於逆亂其來已久梁人分之雄曰失策然亦不  
為無自而遽叛降于晉綱目於此既不書其軍亂又不書其叛

梁止以降晉書之

以梁人為篡弑之國晉人仗興復之名故

其書法如此然後

綱目誅亂臣討賊子之意雖易世一日也

嗚呼嚴矣

劉知俊徐州沛人少事時溥溥與梁相攻知俊與其麾下二千人降  
梁梁王以為開道指揮使勇出諸將名重軍中歷三州刺史天復癸  
亥秋從破青州以功表匡國節度使開平戊辰五月蜀岐晉會兵攻  
梁雍州梁主遣知俊拒却之己巳正月知俊擊敗楊崇本取丹延鄜  
坊四州加檢校太尉封大彭郡王是時佑國王重師鎮長安數年梁  
主怒其貢奉不時召重師入朝以劉捍代之捍至長安譖重師於梁  
主賜之自盡夷其族知俊功名浸盛以梁主猜恐日甚內不自安及  
王重師誅知俊益懼梁主將伐河東急徵知俊入朝欲以為河東西

面行營都統且以知俊有丹延之功厚賜之知俊弟右保勝指揮使知浣從梁主在洛陽密使人語知俊云入必死又白梁主請帥弟姪往迎知俊梁主許之六月乙未朔知俊奏爲軍民所留遂以同州附於岐執監軍將佐之不從者皆械送於岐遣兵襲華州逐刺史蔡敬思以兵守僮開潛遣人以重利啗長安諸將執劉捍送於岐殺之知俊遣使請兵於岐亦遣使請晉人出兵攻晉絳遺晉王書曰不過旬日可取兩京復唐社稷梁主遣近臣諭知俊曰朕待卿甚厚何忽相負對曰臣不背德但畏族滅如王重師耳梁主復使謂之曰劉捍言重師陰結邠岐朕今悔之無及捍死不足塞責知俊不報詔削知俊官爵命楊師厚劉鄩等討之太祖發洛陽劉鄩至潼關東獲知俊伏路兵使爲前導關吏納之鄩兵乘門開直進遂克潼關追及知浣擒之梁主至陝遣知俊姪嗣業持詔詣同州招諭知俊知俊欲輕騎詣行在謝罪弟知偃止之楊師厚等至華州知俊將聶賞開門降知俊聞潼關不守官軍繼至蒼黃失圖乙卯舉族奔岐楊師厚至長安岐兵已據城師厚以奇兵急趨自西門入遂克之岐王厚禮知俊以爲中書令地挾無藩鎮處之但厚給俸祿而已十一月岐王欲取靈州以處知俊且以爲牧馬之地使知俊自將兵攻之朔方節度使韓遜告急于梁梁主遣康懷貞等攻邠寧以救之克寧行二州拔慶州南城遊兵侵掠至涇州之境知俊聞之解圍引還十二月梁主急召懷貞等還知俊遣兵據險邀之王彥章力戰懷貞等乃得過至昇平知俊伏兵山口懷貞大敗僅以身免岐王以知俊爲彰義節度使鎮涇州辛未八月岐王使知俊及李繼崇將兵擊蜀蜀將王宗侃等與之



戰於青泥嶺蜀兵大敗宗侃等收散兵走保安遠軍知俊繼崇追圍之蜀主遣王宗播將兵救之合擊岐兵大破之蜀主又命王宗弼將兵及知俊戰于斜谷破之岐兵解圍遁去岐王左右石簡顥讒知俊于岐王王奪其兵李繼崇曰知俊壯士窮來歸我不宜以纜廢之岐王爲之誅簡顥以安之繼崇召知俊舉族居于秦州乙亥十一月蜀王宗翰等敗秦州兵於金沙谷克階成州秦州節度使李繼崇遣子迎降知俊攻邠州半歲不克聞秦州降蜀妻子皆遷成都解圍還鳳翔懼及禍夜帥親軍奔蜀蜀王以知俊爲都招討使諸將皆舊功臣多不用其命且疾之故無成功唐文晟數毀之蜀主亦忌其才嘗謂所親曰吾老矣知俊非爾輩所能馭也丁丑十二月乃誣以謀叛斬之

綱目戊辰

梁開平二

夏五月蜀岐晉會兵攻梁雍州梁遣忠武節度使

劉知俊拒却之己巳夏六月梁劉知俊叛犇岐乙亥

梁貞明二十一月

蜀遣兵攻岐岐將劉知俊犇蜀丁丑十二月蜀殺其招討使劉知俊

卮言曰劉知俊所在見忌其才可知矣夫人以智勇處亂世而欲建功名保爵祿亦非誠一莫與也使徒擇利害爲去就而反覆依人觀望圖事適足滋忌耳幸免於此其不受禍於彼乎

閻寶鄆州人少爲朱瑾牙將瑾走淮南寶降於梁梁主時爲諸軍都虞侯常從諸將征伐未嘗獨立戰功乾化中以寶爲保義節度使乙亥五月賀德倫以魏博降晉晉兵攻下洛磁相衛移兵圍邢州寶拒守梁主遣捉生都指揮使張溫將兵五百救之溫以其衆降晉晉王

自將攻邢州昭德張筠棄相州走晉王遣人告寶以相州已拔又遣張溫帥拔兵至城下諭之寶舉城降

相州拔則邢州之勢孤張溫降則援兵之望絕

晉王以

寶為東南面招討使領天平節度使同平章事位在諸將上及梁晉戰胡柳晉軍敗晉王欲引兵退保臨濮寶曰夫決勝料勢決戰料情

情勢既得斷在不疑今梁兵窘蹙其勢可破勝而驕怠其情可知此不可失之時也晉王謝曰微公幾敗吾事乃整軍復戰遂敗梁兵其

後晉軍討張文禮於鎮州以寶為招討使寶戰敗退保趙州慙憤發疽卒追贈太師晉天福中追封太原王子弘魯歷陝州司馬後居兗

州漢乾祐壬子為慕容彥超所殺

張萬進初隸義昌軍為都指揮使乾化壬申三月節度使劉繼威燕劉守光之子也年少淫虐類其父淫於萬進家萬進怒殺之詰且召

大將周知裕告其故萬進自稱留後以知裕為左都押牙遣使奉表

請降于梁亦遣使降于晉晉王命周德威安撫之知裕心不自安遂犇梁梁主為之置歸化軍以知裕為指揮使凡軍士自河朔來者皆

繇之以萬進為義昌留後尋改義昌為順化軍以萬進為節度使甲戌六月楊師厚與劉守奇將兵攻鎮州不克度河逼滄州萬進懼請

遷于河南師厚表萬進鎮青州六月戊子以萬進為平盧節度使貞明戊寅十月萬進輕險好亂時嬖倖用事多求賂於萬進萬進聞晉

兵將出遣使附於晉且求援梁主遣劉鄩將兵討之圍兗州城經年城中危窘晉方與梁戰河上力不能救遂克之初萬進遣親將劉處

讓乞師於晉晉王未之許處讓於軍門截耳曰苟不得請生不如死

晉王義之將為出兵會鄩已屠兗州族萬進乃止

綱目戊寅

梁貞明四

秋八月梁參寧節度使張萬進降晉已卯冬十月

梁克宥州殺張萬進

後唐鎮將章

盧文進初爲劉守光騎將唐主存勗爲晉王時帥兵攻范陽文進以光降拜壽州刺史晉王以其弟存矩爲新州刺史統山後八軍以文進爲裨將丁丑正月存矩在新州驕惰不治侍婢預政晉王復募山北部落驍勇者及劉守光士卒以益南討之軍又率其民出馬民或鬻十牛易一戰馬斯會迫促邊人嗟怨存矩得五百騎自部送之文進從行行者皆憚遠役存矩復不存恤行至祁溝關小校宮彥璋與士卒謀曰聞晉王與梁人確鬪騎兵歿傷不少吾儕損父母妻子爲人客戰千里送死而使長復不矜恤奈何衆曰殺使長擁盧將軍還

新州據城自守其如我何因執兵火謀趣傳舍朝存矩寢未起就殺之文進不能制撫膺哭其尸曰奴輩旣害郎君使我何面復見晉王因爲衆所擁還新州守將楊全章拒之又攻武州李嗣肱擊敗之周德威亦遣兵追討文進遂帥其衆奔契丹三月文進引契丹兵急攻新州刺史安金全不能守棄城走文進以其部將劉殷爲刺史使守之晉王使周德威合河東鎮定之兵攻之旬日不克契丹主帥衆二十萬救之德威大敗奔歸契丹乘勝進圍幽州文進教之攻城周德威遣使詣晉王告急王方與梁相持河上遣李嗣源將兵救之契丹大敗幽州圍解契丹以文進爲盧龍留後尋以爲節度使居平州歲入北邊殺掠吏民自晉人自瓦橋運糧輸薊城雖以兵援之不免抄掠契丹每入寇則文進帥漢卒爲之鄉導盧龍廵屬諸州爲之殘弊

晉王稱帝國號唐丙戌三月嗣源反兵內向四月唐主爲伶人所弑  
嗣源入洛陽自立改名亶時文進爲契丹守平州遣間使說之以易  
代之後無復嫌怨文進所部皆華人思歸乃殺契丹戍平州者帥其  
衆十餘萬軍帳八千乘來奔唐主大喜以爲義成節度使居歲餘徙  
鎮威勝加同平章事入爲上將軍出鎮昭義又徙安遠癸巳十一月  
唐主亶殂子從厚立甲午四月唐潞王從珂反弑唐主從厚而自立  
清清泰丙申十一月契丹立石敬瑭爲晉帝約爲父序唐主從珂自  
焚死晉主入洛陽文進懼不自安乃殺其行軍司馬馮知兆副使杜  
重貴送款於唐唐主昇遣兵迎之文進居數鎮頗有善政兵民愛之  
其奔吳也所過鎮戍召其主將告之故皆拜辭而退昇以文進爲天  
威統軍宣潤節度使文進身長七尺狀貌甚偉然自其奔契丹也數  
引契丹攻掠幽薊之間虜其人民教契丹以中國織紵工作無不備  
契丹由此益彊契丹爲唐患者十餘年皆文進爲之也及其南奔始  
屈身晦迹務爲恭謹禮接文士謙謙若不足其所談論近代朝廷儀  
制臺閣故事而已未嘗言兵後以左衛上將軍卒

綱目丁丑

梁貞明三

春二月

晉新州裨將盧文進殺其防禦使李存矩

亡奔契丹丙戌

唐天成元

冬十月契丹盧龍節度使盧文進奔唐丙申

晉天福元

十二月唐安遠節度使盧文進奔吳

尹氏曰盧文進以部將殺其主帥而不書作亂以中國亡奔夷  
狄而不書叛降則亦以李存矩召亂至此故也及其奔唐何以  
不叛背夷向華理之正也况文進本中國之人又與夷狄種落  
不同故書法如此至其奔吳是時唐已滅矣而文進猶繫之唐

者明其耻立事夷狄所立之君耳既不事之則文進固唐之臣也書爵所以予盧不書叛所以惡晉

卮言曰盧文進始殺唐主弟以附契丹既引契丹以爲唐患及明宗說之歸唐契丹立晉而復奔吳此以禍福爲去就耳豈真有忠唐惡晉之心哉綱目三書出奔而文進反覆之情狀見矣豈必皆爲予乎

房知溫死州取兵人少以勇力爲赤甲都官健後隸魏州馬閑軍稍遷親隨軍指揮唐主存勗取魏博得知溫賜姓李氏名曰紹英以爲澶州刺史歷曹貝二州刺史戍瓦橋關李嗣源自魏反兵南向知溫首馳赴之拜泰寧節度使魏州自羅紹威誅衙軍揚師厚爲節度使復置銀槍效節軍當梁主瑱時師厚幾爲梁患師厚卒以賀德倫伏

之梁主患魏軍疆難制與趙巖等謀分相魏爲兩鎮魏軍由此作劫德倫叛梁而降晉梁遂失河北唐主存勗自得魏兵與梁戰河上數有功許其軍以滅梁而厚賞及梁亡魏軍雖數賜與而驕縱無厭常懷怨望皇甫暉之亂劫趙在禮入魏皆此軍也嗣源入立以在禮鎮天雄軍丁亥三月在禮以魏軍數驕自謀脫禍陰遣腹心詣闕求移鎮唐主乃以其子從榮代在禮而遣魏效節九指揮三千五百人北戍盧臺軍發之日不給鎧仗惟以長竿繫旗幟以表隊伍軍士頗自疑惑既至唐主不次擢烏震爲副招討使往代知溫還鎮而知溫怨震驟來代已盧臺戍軍夾水東西爲兩寨震初至召知溫與安審通會東寨方博知溫誘效節軍擊殺震其衆譟於營外安審通脫身濟河按甲不動知溫恐事不濟亦乘馬而出甲士攬其轡曰公當爲

士卒主去欲何之知溫詒之曰騎兵皆在西寨不收取之獨有步軍何能集事遂躍馬登舟渡河入西審與安審通合謀以騎軍盡殺亂者唐主下詔悉誅其家屬于魏州凡九指揮三千餘家數萬口驅至漳水上殺之漳水爲之變赤魏之驕兵於是而盡唐主知知溫首亂欲安反灰釋而不問徙鎮武寧加兼侍中歷鎮天平平廬初唐主爲北面招討使知溫爲副都部署李從珂以別將事之嘗被酒忿爭拔刃相擬癸巳十一月唐主亶殂子從厚立甲午正月潞王從珂反鳳翔舉兵東向唐主出奔知溫乘間有窺覷之志謂其司馬李冲曰吾有錢數屋養兵數千因時建義功必有成冲曰今天子孱弱上下離心潞王兵威甚盛事未可知冲請懷表而西以覘之及冲至京師從珂已弑唐主從厚而自立冲卽奉表稱賀還勸知溫入朝謝罪唐主優禮之知溫貢獻甚厚遣還鎮封東平王知溫在鎮常厚歛其民積貨鉅萬治第青州南城出入以聲妓遊戲嬉不恤政事晋天福丙申十一月卒

康延孝代北人爲太原軍卒有罪亡命於梁梁主瑱龍德癸未八月時趙巖張漢傑用事段凝代王彥章爲招討使監大軍於河上以延孝爲左右先鋒指揮使凝晚進厚賂趙張以得節鉞於是宿將憤怒唐主自將屯朝臣延孝帥百餘騎來奔唐主解所御錦袍玉帶賜之以爲南面招討都指揮使領博州刺史唐主屏人問延孝梁事延孝具言梁主暗懦趙巖婿也張漢傑婦家皆用事段凝姦邪以入金多爲大將自其父時故將皆出其下王彥章驍將也遣漢傑監其軍而制之小人進任而忠臣勇士皆見踈斥此其必亡之勢也唐主又問

梁計如何曰臣在梁時竊聞其議期以仲冬大舉令董璋以陝虢澤潞之兵出石會以攻太原霍彥威以關西汝洛之兵掠邢洛以趨鎮定王彥章以京師禁軍攻鄆州段凝以河上之軍當陛下唐主懼曰其將何以禦之延孝曰梁兵雖衆分則無餘臣請待其既分以精騎五千自鄆趨汴出其不意擣其空虛不旬日天下定矣唐主悅後董璋等雖不出兵而梁兵悉屬段凝于河上京師無備唐主卒用延孝策自鄆入汴凡八日而滅梁以功拜鄭州防禦使賜姓名曰李紹琛明年遷保義軍陝節度使乙酉九月唐主遣魏王繼岌郭崇韜代蜀以紹琛爲克蕃漢馬步軍都排陳斬所使兼馬步軍都指揮使紹琛與李嚴將驍騎二千步兵八萬爲前鋒破鳳州取故鎮降興州與蜀三招討戰于三泉蜀兵三敗斬首五千級蜀主至利州聞之倍道西

走斷桔柏津浮梁命王宗弼守利州紹琛晝夜兼行趣利州宗弼棄城西歸紹琛至利州修桔柏浮梁以渡進取綿州蜀兵又斷錦江浮梁紹琛謂李嚴曰吾懸軍深入利在速戰乘蜀人破膽之時但得百騎過鹿頭關彼且迎降不暇若俟修繕橋梁必留數日或教王衍堅閉近關折吾兵勢儻延旬浹則勝負未可知矣乃與嚴乘馬浮度江從兵得濟者近千人溺死者亦千餘人遂入鹿頭關進據漢州居二日後軍始至宗弼遂以蜀降紹琛屯漢州以俟魏王繼岌八日而繼岌崇韜至蜀主衍出降大軍入成都蜀亡平蜀之功紹琛爲多位在董璋上而璋素與郭崇韜善崇韜數召璋與議軍事紹琛心不平謂璋曰吾有平蜀之功公等樸櫟相從反咕囁於郭公之門謀相傾害吾爲都將獨不能以軍法斬公邪璋訴于崇韜崇韜表璋爲東川節

度使解其軍職紹琛愈怒曰吾冒白刃凌險阻定兩川璋乃坐有之邪乃見崇諤言東川重地任尚書有文武才宜表爲帥崇諤怒曰紹琛反邪何故違吾節度紹琛懼而退唐主以孟知祥爲西川節度使丙戌正月魏王繼岌以劉皇后教殺郭崇諤及其三子于蜀崇諤死紹琛謂董璋曰公復欲咕囁誰門乎璋懼謝罪唐主又以景進言殺朱友謙於河中滅其族詔繼岌誅其子令德於遂州斷岌發成都命紹琛帥萬二千人爲後軍行止常差中軍一舍繼岌還至武連遇敕使諭以朱友謙已伏誅令董璋將兵之遂州誅朱令德紹琛將後軍在魏城聞之以唐主不委已殺令德而委璋大驚俄而璋過紹琛軍不謁紹琛怒乘酒謂諸將曰國家南取大梁西定巴蜀皆郭公之謀而吾之成功也至於去逆效順與國家掎角以破梁則朱公也今朱郭皆無罪族滅歸朝之後行及我矣冤哉天平奈何紹琛所將多河中兵河中將焦武等號哭於軍門曰西平王何罪闔門屠膾我輩歸則與史武等決不復東矣是日魏王繼岌至泥溪紹琛至劍州遣人白繼岌云河中將士號哭不止欲爲亂遂自劍州擁兵西還自稱西川節度三川制置等使移檄成都稱奉詔代孟知祥招諭蜀人三日間衆至五萬魏王至利州紹琛遣人斷桔柏津繼岌遣任圜將兵追討之及於漢州紹琛逆戰而敗遂入漢州閉城不出圜攻之紹琛奔綿竹追禽之孟知祥自至漢州犒軍與任圜董璋置酒高會引紹琛檻車至座中知祥自酌大卮飲之謂曰公何患不富貴而求入此邪紹琛曰郭侍中佐命功第一兵不血刃取兩川一旦無罪族誅如紹琛輩安保首領以此不敢歸朝耳



綱目癸未

梁龍德三  
唐同光元

秋八月梁將康延孝奔唐丙戌

同光四年

春二月

唐李紹琛反於蜀魏王繼岌使工部尚書任圜討之任圜破李紹琛擒之

尹氏曰康延孝一將之降本乏人道然唐之滅梁梁之見滅決於是矣故書夫延孝為梁將逃奔于唐不書其叛者梁為篡弑之國故延孝得以未減其罪耳至於委身事唐改賜姓名受其寵爵萬一事變之來當守死無貳庶幾少雪前耻今乃隨時利輕於向背則是反覆不義之人矣直書曰反正其罪也

董璋史不知其世家何人也少與高季興孔循俱為汴州富人李讓家僮梁主冕鎮宣武養讓為子是為朱友讓璋以是得事梁主以軍功為指揮使梁主從珂時為澤州刺史梁亡事唐為邠寧節度使

光乙酉九月璋從郭崇韜伐蜀以璋為行營右廂馬步軍都虞候璋素與崇韜善軍事大小皆與璋參決蜀平表璋為劍南東川節度使時孟知祥鎮西川兵後二人有異志時安重誨用事議者多言知祥必不為唐用而能制知祥者璋也往往稱璋忠義重誨以為然頗優寵之以故璋益橫己丑十二月唐主將祀南郊遣客省使李仁矩以詔諭兩川令西川獻錢一百萬緡東川五十萬緡皆辭以軍用不足西川五十萬東川十萬而已仁矩為安重誨所厚恃恩驕慢至梓州璋置宴召之日中不反往方擁妓酣飲璋怒從卒徒執兵入驛立仁矩於階下而詬之曰公但聞西川斬李客省謂我獨不能邪仁矩流涕拜請僅而得免既而厚賂仁矩以謝之仁矩還言璋不法未幾唐主復遣通事舍人李彥珣詣東川入境失小禮璋拘其從者彥珣奔

還鄜州兵戍東川者歸本道璋擅留其壯者選羸老歸之仍收其甲  
兵重誨患之乃稍擇將吏爲兩川刺史以精兵爲其牙衛分布諸州  
又割閬果二州置保寧軍以李仁矩爲節度使使與綿州刺史武虔  
裕皆將兵赴治重誨使仁矩調璋反狀仁矩增飾而奏之又使武信  
節度使夏魯奇治遂州城隍繕甲兵益兵戍之璋大懼時道路傳言  
又將割綿龍爲節鎮孟知祥亦懼璋素與知祥有隙未嘗通問至是  
璋遣使詣成都請爲其子娶知祥女知祥許之謀并力以拒朝廷長  
興庚寅二月璋遣兵築七寨於劔門孟知祥遣趙季良如梓州修好  
季良還謂知祥曰董公貪殘奸勝志大謀短終爲西川之患知祥與  
璋同上表言兩川聞朝廷於閬中建節綿遂益兵無不憂恐唐主以  
詔書慰諭之璋閱集民兵皆剪髮黥面復於劔門北置永定關布列

烽火遣兵掠遂閬鎮戍八月璋子光業爲宮苑使在洛陽璋與書曰  
朝廷割吾支郡爲節鎮屯兵三千是殺我必矣汝見樞要爲吾言朝  
廷更發一騎入斜谷吾反與汝訣矣光業以書示樞密承旨李虔徽  
虔徽未幾又遣別將荀咸又將兵戍閬州光業謂虔徽曰此兵未至  
吾父必反吾不敢自愛恐煩朝廷調發願止此兵吾父保無它虔徽  
以告安重誨重誨不從璋聞之遂反閬遂三鎮以聞重誨曰臣久知  
其如此陛下舍容不討爾唐主曰我不負人人負我則討之九月孟  
知祥遣使約璋同舉兵璋移檄利閬遂三鎮數其離間朝廷引兵擊  
閬州孟知祥遣仁罕等將兵三萬攻遂州侯弘實等將兵四千會璋  
攻閬州旣而東川兵至閬州諸將皆曰董璋久蓄反謀以金帛啗其  
士卒銳氣不敢當宜深溝高壘以挫之不過旬日大軍至賊自走矣

李仁矩曰蜀兵懦弱安能當我精卒遂出戰兵未交而潰歸璋晝夜  
攻之城遂陷殺仁矩滅其族唐族誅光彥削璋官爵遣石敬瑭討之  
十月璋引兵趣利州遇雨還閬州知祥聞之曰比破閬州正欲徑取  
利州其帥不武必望風遁去吾獲其倉廩據漫天之險北軍終不能  
西救武信今董公僻處閬州遠棄劔閣非計也欲遣兵三千助守劔  
門璋固辭曰此已有備遣兵攻徵合巴蓬果五州陷之而卒李仁罕  
亦取遂州石敬瑭攻劔州入散關前鋒將王弘贄等襲劔門克之殺  
東川兵三千人據而守之璋遣使至成都告急孟知祥懼曰董公果  
誤我遣李肇將兵五千赴之而璋亦遣王暉將兵三千人會肇等分  
屯劔州石敬瑭攻之不克敬瑭久無功而自關以西饋運不給遠近  
勞弊唐主患之安重誨自往督軍敬瑭不納重誨遂得罪死敬瑭亦

還兩川兵追之遂陷利州辛卯五月唐主遣西川進奏官蘇愿東川  
軍將劉澄各還本道諭以安重誨專命興兵今已伏辜孟知祥遣使  
告璋欲與之俱上表謝罪璋怒曰孟公親戚皆完固宜歸附璋已族  
滅尚何謝爲由此疑知祥賣已復爲怨敵知祥凡三遣使說之璋不  
從壬辰三月復遣李昊詣梓州極論利害璋詬怒不許昊還言於知  
祥曰璋不通謀議且有窺西川之志公宜備之壬辰三月璋會諸將  
謀襲成都皆曰必克王暉曰劔南萬里成都爲大時方盛夏師出無  
名必無成功璋不從自將破白楊林鎮聲勢甚盛知祥憂之趙季良  
曰璋爲人勇而無恩士卒不附城守則難克野戰則成擒矢今不守  
巢穴公之利也璋用兵精銳皆在前鋒公宜以羸兵誘之以勁兵討  
之始雖小刃後必大捷璋素有威名今舉兵暴至人心危懼公當自

出禦之以彊衆心乃以趙廷隱為都部署將兵三萬拒之五月璋克漢州知祥自將兵八千趣漢州兵始交璋指揮使張守進於知祥知祥急擊之東川兵大敗死者數千人璋與數騎遁去知祥引兵追至赤水而還命匡隱梓州璋至梓州王暉帥兵三百大呼而入璋引妻子登城呼指揮使潘稠使討亂兵稠斬璋首以授暉暉舉城迎降璋據東川凡八年

綱目乙酉

同光三年

十二月唐以董璋為東川節度使庚寅

唐長興元年

秋八月

唐兩川節度使董璋孟知祥連兵反九月遣天雄節度使石敬瑭討之不克壬辰夏四月董璋襲兩川五月孟知祥擊敗之璋為其下所殺知祥遂取

王建立遼州榆社人初唐主嗣源為代州刺史以建立為虞戾時唐之晉王怒欲殺之嗣源為庇護之以免嗣源自魏反兵向京師家屬皆在常山建立殺常山監軍并其守兵因得無患由是嗣源益愛之嗣源募立以建立為成德節度使天成戊子三月建立與安重誨素不叶定州王都有異志數以書通建立約為兄弟重誨知之以為言建立亦奏重誨專權求入朝面言其狀唐主召之建立入見亦多言重誨過失唐主大怒欲亟罷重誨羣臣左右諷解之乃止然卒以建立為右僕射同平章事判宜司事居歲餘自以目不知書請罷荆三司唐主不許久之建立稱疾唐主笑曰人固有詐疾而得疾者乃出為平盧軍節度使又徙昭義建立快快不得志遂求解職庚寅四具安重誨言建立過魏州有搖衆之語五月丙寅制以太傅致仕乃以

太子少保致仕建立數請朝見不許乃自詣京師闌至後樓見唐王  
涕泣言已無罪為重誨所擠唐主曰汝為節度使不作好事豈獨重  
誨讒汝耶賜以茶藥而遣之唐主殂潞王從珂弒嗣主從厚而自立  
復以建立為天平軍節度使丙申冬契丹立石敬瑭為晉皇帝唐主  
從珂自焚死晉志入洛陽建立自天平徙鎮平盧天福庚子三月建  
立入朝晉主勞之曰三十年前老兄可母拜賜以肩輿入朝給二宦  
者掖而升殿宴見甚渥建立請致仕不許徙為昭義節度使賜以王  
斧蜀馬進爵韓王又以建立遼人割遼沁二州隸昭義建立好殺人  
其晚節浮始惑浮屠法戒殺生所至人稍安之卒年七十贈尚書令

綱目戊子

康天  
成三

春三月唐以王建立同平章事

王守恩建立子初事晉人為左驍衛大將軍建立卒晉以張從恩為

昭義節度使丁未正月契丹主入大梁廢晉主重貴為負義侯從恩  
以地迫懷洛欲入朝於契丹遣使謀於劉知遠知遠曰君宜先行我  
當繼徃從恩以為然判官高防諫曰公以晉室懿親不可輕變臣節  
從恩不從守恩與從恩姻家時在上黨從恩以副使趙行遷知留後  
牒守恩權巡檢使與高防佐之二月劉知遠稱帝于晉陽高防與守  
恩謀遣指揮使李萬超白晝帥眾大譟入府斬趙行遷推守恩權知  
昭義留後守恩殺契丹使者舉鎮降晉陽四月晉主知遠以守恩為  
昭義節度使契丹所署昭義節度使耿崇美屯澤州將攻潞州晉主  
知遠遣史弘肇將步騎萬人救之契丹河陽節度使崔延勳以兵送  
崇美之潞州武行德遂乘虛入據河陽延勳至澤州聞弘肇兵已入  
潞州不進引兵而南弘肇追擊破之遂取澤州六月晉主知遠入大

梁始改國號曰漢守恩徙爲靜難節度又徙永興乾祐己酉二月爲西京留守同平章事守恩性貪鄙專事聚斂八月甲申郭威自河中還過洛陽守恩自恃位兼將相肩輿出迎威怒以爲慢已辭以浴不見卽以頭子命白文珂代守恩爲留守文珂不敢違守恩猶坐客次吏白新留守已視事於府矣守恩大驚狼狽而歸見家屬數百已逐出府在通衢矣漢主不之問以文珂克西京留守守恩至大梁恐獲罪廣爲貢獻重賂權貴漢主亦以守恩首舉潞州歸漢故宥之但誅其用事者數人而已

楊光遠其父曰阿瞪啜沙陀部人也其後改名瑛而姓楊氏光遠初名阿檀爲唐主存勗騎將戍瓦橋關唐主嗣源時歷四州刺史拜宣武節度使潞王從珂弒立賜名光遠石敬瑭起兵晉陽唐主從珂以

光遠佐張敬達爲招討副使爲契丹所敗退守晉安寨十一月契瑭立石敬瑭爲晉皇帝會兵圍晉安寨光遠與安審琦勸敬達降於契丹敬達不從光遠乃斬敬達帥諸將上表降于契丹契丹以晉主南下唐主自焚死晉主入洛陽以光遠爲宣武軍節度使徙西京留守兼鎮河陽天福丁酉六月范延光舉兵反遣光遠帥兵討之敗魏兵于六明鎮攻廣晉歲餘不下戊戌九月延光降徙鎮天平以光遠爲天雄節度使十一月晉主患光遠跋扈難制桑維翰請分天雄之衆加光遠西京留守兼河陽節度使光遠由是怨望密以賂自訴於契丹養部曲于餘人常蓄異志庚子七月光遠使其子承貴殺范延光于西京光遠入朝晉主徙光遠爲平盧節度使進爵東平王壬寅六月晉主敬瑭殂兄子重貴立光遠進封壽王初晉主以馬三百借光

遠景延廣以詔命取之光遠怒曰是疑我也癸卯十一月密召其子單州刺史承祚承祚稱母病夜開門奔青州乃以何超權知單州遣內班賜光遠玉帶御馬以安其意又遣郭謹將兵戍鄆州以防河津

使光遠不得與契州交通也十二月又遣蔡行遇將兵戍鄆州光遠遣騎兵入淄

州劫刺史翟進宗歸于青州詔徙承祚為登州刺史以從其便光遠

益驕密告契丹以晉主負德違盟境內大饑公私困竭乘此際攻之

一舉可取趙延壽亦勸之契丹主乃集兵五萬使延壽將之入寇成

德節度使杜威遣幕僚曹光裔詣光遠為陳禍福光遠遣光裔入奏

稱承祚逃歸母疾故爾既蒙恩宥闔族荷恩朝廷信其言遣光使與

光裔復往慰諭之博州刺史周儒以城降契丹又與光遠通使往還

引契丹自馬家口甲辰濟河擒蔡行遇竇儀謂景延廣曰虜若濟河

與光遠合則河北危矣二月周儒引契丹將麻答自馬家口濟河營

於東岸攻鄆州北津以應光遠晉遣李守貞等攻拔其營契丹大敗

河西之兵痛哭而去由是不敢復東光遠之援絕矣光遠將青州兵

欲西會契丹詔石贇等分兵屯鄆州以備之壬戌光遠圍棗州刺史

李瓊出兵擊走之光遠燒營走還青州甲辰四月晉遣李守貞將步

騎二萬討光遠於青州又遣潘環及張彥澤等將兵屯澶州以備契

丹契丹遣兵救青州齊州防禦使薛可言邀擊敗之十二月李守貞

圍青州經時城中食盡餓死者大半契丹援兵不至楊光遠遙稽首

於契丹曰皇帝皇帝誤光遠矣其子承勳承祚承信勸光遠降冀全

其族光遠不許曰吾昔在北代以紙錢祭天地而沈人皆言當為天

子姑待之丁巳承勳斬勸光遠反者節度丘濬等送其首於守貞縱

其首於守貞縱

火大掠劫其父出居私第上表待罪開城納官軍晉主以光遠罪大而諸子歸命難於顯誅命李守貞以便宜從事閏月癸酉守貞入青州遣人拉殺光遠於別第以病死聞丙戌起復楊承勳除汝州防禦使

綱目乙未

唐清泰二

冬十二月唐將楊光遠殺招討使張敬達降于契

丹戊戌

晉天福二

秋九月晉以揚光遠為平盧節度使辛丑十二月晉

揚光遠誘契丹入寇甲辰

晉開運元

冬十二月晉師圍青州楊光遠之

子承勳劫其父以降閏月晉李守貞殺揚光遠

胡氏曰光遠不肯臣事契丹是也既而舉兵與契丹合則其情實反矣承勳以義迫其父開門納官軍變而不失正亦可矣父既被殺而已乃受賞於心何安無乃被圍之時自虞及禍故為

劫降之許歟

天台胡氏曰昔楚令尹子南以罪誅其子弃疾以不忍棄父事讐而死李懷光之反河中既破唐德宗欲活其子璀而不可得彼二子者以父子之親居君臣之變審義安命以死狗親夫豈不樂生義不可也若揚承勳兄弟出於藩落梟獍其心囚父歸命以希苟活晉朝以不殺降為說於理且未安又從而錄用之宜異時契丹得假大義以洩其憤也

楊承信光遠第三子幼以父任自義武軍節院使領蘭州刺史歷宣武平盧二軍牙校光遠敗死承信與弟承祚詣闕請死詔釋之以承信為羽林將軍承祚為右驍衛將軍放歸服喪私第尋安置鄭州初光遠送款契丹求援兵未至而光遠降丁未正月契丹主滅晉入大



梁執承勲至大梁責以殺父叛契丹命左右齎食之未幾時承信爲平盧軍節度悉以其父舊兵授之漢時歷徙鄭汝二州節度累加檢校太師周廣順初加同平章事諸軍西討劉崇承信表求預行以郊祀恩加開府階封杞國公周主榮立進封韓顯德中征淮南爲濠州攻城副都部署改壽州北砦都部署兼知行府事壽州平累戰功擢忠正軍節度同平章事時徙州治下蔡承信既增廣其城又遣監軍薛友柔敗淮人六百餘于廬州北周主宗訓立改封魯宋初加兼侍中來朝會征李筠命爲澤州四面都部署筠平移鎮河中乾德元年進封趙國公二年卒承信美儀表善持論且多藝能雖叛臣之子然屢歷藩鎮刻厲爲政而不苛故能始終富貴其卒也蒲民表乞祠之則其遺愛之在人者可知矣

高行周媯州人也世爲懷戎戍將父思繼思繼兄弟皆以武勇雄於北邊爲幽州節度使李匡威戍將匡威爲其弟匡儔所篡晉王克用將討其亂謀曰高思繼兄弟在孔嶺關有兵三千此後患也不如遣人招之思繼爲吾用則事無不成克用遣人招思繼兄弟燕俗重氣義思繼等聞晉爲匡威執仇乃欣然從之爲晉兵前鋒匡儔聞思繼兄弟皆叛乃棄城走克用以劉仁恭守幽州以思繼兄爲先鋒都指揮使思繼爲中軍都指揮使其弟爲後軍都指揮使高氏兄弟分掌燕兵克用臨訣謂仁恭曰思繼兄弟勢傾一方爲燕患者必高氏也宜善爲防克用留晉兵千人爲仁恭衛而晉兵多犯法思繼等數誅殺之克用以責仁恭仁恭以高氏爲訐由是晉盡誅思繼兄弟仁恭以其兄之子行珪爲牙將時行周年十餘歲亦收之帳下稍長補以

軍職守光囚仁恭而自立以行珪爲武州刺史行周從之至州梁乾化癸酉秋晉王存勗遣李嗣源攻武州行珪以城降改授代州刺史行周留事嗣源常與嗣源假子分將牙兵以從其後晉王稱帝滅梁國號後唐三年嗣源爲亂兵所迫引兵向大梁唐主遇弒嗣源自立三年殂子從厚嗣立潞王從珂反鳳翔弒從厚而自立三年丙申四月石敬瑭反於晉陽唐主以張敬達爲太原四面招討使以行周爲太原四面招撫排陣等使七月敬瑭遣使求救於契丹契丹自將救之行周與符彥卿將騎兵合戰敬瑭遣劉知遠出兵助契丹唐兵大敗騎兵獨全十一月契丹立敬瑭爲帝揚光遠等斬敬達降于契丹十二月契丹以晉主敬瑭南下唐主從珂自焚死晉主入汴以行周爲昭義節度使累遷鄴都晉守晉主敬瑭殂兄子重貴立開運甲辰楊光遠叛晉引契丹入寇晉主以行周爲北面行營都部署契丹引去晉主命行周與王周留鎮澶州丙午十一月契丹大舉入寇晉主以行周爲北面都部署符彥卿副之共戍澶州已而杜威李守貞舉軍降于契丹丁未正月契丹主德光入大梁晉之藩鎮爭上表稱臣行周與彥卿皆降牙契丹二月劉知遠稱帝於晉陽三月遼主北歸而卒六月晉主知遠入大梁改國號曰漢七月行周入朝時杜重威爲鄴都留守徙鎮歸德以行周代之重威拒命詔以行周爲招討使慕容彥超爲之副以討之八月重威降戊申二月漢主知遠殂子承祐立乾祐己酉九月加行周守太師庚戌三月行周入朝徙鎮天平辛亥正月郭威篡位國號周以行周爲中書令封齊王顯德壬子八月卒

庖言曰五代藩臣將帥擁兵拒敵敗則降之觀望反覆恬不知怪蓋其君數易如弈碁固宜爲之臣者朝秦暮燕隨局轉徙耳高行周於唐晉之間累握兵權自爲征討而累從諸將歸降敵國雖楊光遠杜重威李守貞等爲之倡首而行周符彥卿輩亦當時名將繼踵效尤豈有臣道哉卒保富貴復全功名則其見幾自守不爲禍始之徵矣故亦系之此篇若馮道歷相累朝賣國爲利忘君不恤則姦賊之尤又不當與此輩同日而道也

長從簡陳州人世本屠羊從簡初事晉王克用爲軍校力敵數人善用槊晉王存勗用兵攻城從簡多爲梯頭晉王愛其勇以功累遷步軍都指揮使晉王與梁軍對陣梁軍有執大旗出入陣間者晉王登高丘望見之歎曰彼猛士誰能爲我取之者從簡因前請往晉王惜

之不許從簡潛率數騎馳入梁軍奪其旗而還莊軍中皆鼓譟晉王壯之賜與甚厚然其爲人剛暴難制晉王每屈法優容之晉王滅梁稱唐帝從簡賜姓名曰李紹瓊累遷蔡州防禦使唐主亶時歷麟汝汾金泗州防禦使唐主管戒之曰富貴可惜然汝不能守也先帝能貸爾吾恐不能從簡性不可悛唐主亦不之責唐主亶殂子從厚立潞王從珂反鳳翔從簡與諸鎮兵圍之已而兵潰從簡東走被執從珂責其不降從簡曰事主不敢二心從珂釋之以爲隸州團練使丙甲五月石敬瑭起太原契丹助之唐主從珂將親征召從簡爲招討副使從至河陽拜河陽三城節度使契丹立敬瑭爲晉帝引兵南下唐主遇洛陽命從簡與趙州刺史劉在明守河陽南城遂斷浮梁歸洛陽晉主至河陽從簡迎降丹楫已具

廢帝遂斷河梁而長從簡具丹楫以濟晉兵

彰聖

軍執劄在明以降晉主使復其所晉祖入洛陽從簡歷鎮忠武武寧  
為左金吾衛上將軍卒

綱目丙申唐清泰三十一月晉主至河陽節度使萇從簡迎降唐  
主從珂自焚死

尹氏曰自河東拒命唐人習於迎降而不耻故楊光遠降於前  
趙德均降于後至是又書從簡迎降則唐主誰與守哉從簡既  
降猶以節度使書之者所以著其據有藩鎮力足拒敵而不拒  
耳初非予其降而書其爵也

趙德均幽州人初名行實事劉守光為軍使後唐主存勗為晉王時  
滅燕賜德均姓名李紹斌及稱帝以為橫海節度使同光乙酉春契  
丹犯塞以紹斌為盧龍節度使紹斌請復姓趙從之仍賜名德均德

均養子延壽尚唐主女興平公主故德均尤蒙寵任戊子二月玉都  
反定州奚契丹助之唐遣王晏球等擊走之八月德均遣將邀擊契  
丹兵擒其將惕隱自是契丹沮氣不敢輕犯塞德均加兼侍中累進  
兼中書令封北平王丙申五月石敬瑭起兵太原唐主遣張敬達等  
討之敬瑭遣使求救於契丹九月契丹主德光將兵救石敬瑭唐兵  
大敗敬達等收餘眾保晉安寨唐主詔德均與天雄范延光等軍共  
救之唐主自將次懷州議近臣可使北行者羣臣皆曰趙延壽父德  
均以盧龍兵來赴難宜遣延壽會之乃遣延壽將兵二萬如潞州初  
德均陰蓄異志欲因亂取中原自請救晉安寨唐主命自飛狐踵契  
丹後鈔其部落德均請將騎由土門路西入許之趙州刺史劉在明  
戍易州德均以其眾自隨至鎮州十一月以德均為諸道行營都統

延壽遇德均于西湯悉以兵屬焉德均志在併范延光軍逼邈不進  
詔書屢趣之德均乃引兵北屯團栢谷口契丹主立石敬瑭為晉皇  
帝敬瑭割幽薊等十六州以敗之德均欲倚契丹取中國按兵不戰  
去晉安纜百里聲問不能相通德均累表為延壽求成德節度使唐  
主怒曰趙氏父子堅欲得鎮州何意也苟能却胡寇雖欲代吾位吾  
亦甘心若寇玩邀君但恐犬兎俱斃耳德均不悅密以金帛賂契丹  
立云若立已為帝請即見兵南平洛陽與契丹為兄弟仍許石氏  
常鎮河東契丹主欲許之晉主敬瑭聞之懼亟使桑維翰說契丹主  
契丹主從之指帳前石謂德均使者曰我已許石郎此石爛可改矣  
而唐將楊光遠殺張敬達以降契丹契丹主與晉主引兵而南至團  
栢與唐兵戰德均廷壽先遁諸將繼之士卒大潰死者萬計晉主與  
契丹主至潞州德均父子迎謁於高河契丹主鎖之送歸國德均曰  
逆律太后太后問曰汝近者何為徃大凡德均曰奉唐主之命太后  
詰天曰汝從吾兒求為天子何妄語耶又自指其心曰此不可欺也  
又曰吾兒將行吾戒之曰趙大王若引兵北向諭關亟須引歸太原  
不可救也汝欲為天子何不先擊退三兒徐圖亦未晚汝為人臣負  
主不能擊敵又欲乘亂邀利所為如此何面目復求生乎德均俯首  
不能對者是鬱鬱不多食踰年而卒

綱目丙申

唐清泰三年  
晉天福元年

十一月唐以趙德均為行營都統契丹立石

敬瑭為晉皇帝唐趙德均降契丹不受契丹以晉主南下破唐兵

于團栢唐主還河陽趙德均降契丹

趙延壽本姓劉彥令劉卮之子也德均養以為子尚唐主女為宣徽

北院使長興辛卯四月以延壽爲樞密使加同平章事癸巳七月出  
爲宣武節度使潞王從珂弒立以延壽爲忠武節度使石敬瑭反延  
壽兼樞密使將兵討之契丹立石敬瑭爲帝引兵南下延壽與父德  
壽及高契丹領送歸國慙憤卒延壽入契丹契丹主以延壽爲樞密  
使兼政事壬寅六月晉主敬瑭殂兄子重貴立遣使告哀於契  
丹致書稱孫而不稱臣契丹主大怒延壽欲代晉自帝中國屢欲契  
丹入寇契丹主頗然之癸卯十二月楊光遠密告契丹以晉境大饑  
乘此攻之一舉可取延壽亦勸之契丹主乃集兵五萬使延壽將之  
延壽經畧中國曰若得之當立汝爲帝延壽信之由是爲之盡力  
遂取中國之策甲辰正月延壽與延照將兵入寇陷貝州二月晉主  
自將及遣李守貞等分道擊之延壽等皆敗走所過焚掠民將以盡

契丹主以延壽爲魏博節度使封魏王丙午十二月遼主大舉入寇  
晉將王清戰死杜威等以兵降契丹契丹遣兵入大梁執晉主重貴  
以歸丁未正月契丹主入大梁廢晉主爲負義侯侯吏封延壽爲燕  
王延壽以契丹主負約心怏怏令李崧言於契丹主曰漢天子所不  
敢望乞爲皇太子崧不得已爲言之契丹主曰我於燕王雖割吾肉  
有用於燕王吾無所愛然吾聞皇太子當以天子兒爲之豈燕王所  
可爲也因令爲燕王遷官時遼以恒州爲中京張礪奏擬燕王中京  
晉守大丞相錄尚書事都督中外諸軍事樞密使如故契丹主取筆  
塗去錄事都督而行之四月遼主北還見所過城邑丘墟謂蕃漢羣  
臣曰致中國如此皆燕王之罪也契丹主至殺胡林而卒延壽恨契  
丹主負約謂人曰我不復入龍沙矣即日先引兵入恒州永康王元

欲及南北二王各以所部兵相繼而入延壽欲拒之恐失大援乃納之時諸將已密議奉元欲爲主而延壽不知自稱受遼主遺詔權知南朝軍國事仍下告布告諸道所以供給元欲與諸將同元欲銜之恒州諸門管鑰及倉庫出納元欲皆自主之延壽使人請之不與或說延壽曰契丹諸大人數日聚謀此必有變今漢兵不下萬人若不若先事圖之延壽猶預不決壬午延壽下令以來月朔日於待賢舒上事受文武官賀其儀宰相樞密使皆於階上節度使以下拜於階下李崧以虜意不同事理兩測固請延壽未行此禮乃止五月乙酉朔元欲召延壽等於所館飲酒元欲妻素以兄事延壽元欲從容謂延壽曰妹自上國來寧欲見之乎延壽欣然與之俱入良久元欲出謂礪等曰燕王謀反適已鎮之矣又曰先帝許我知南朝軍國近者臨崩別無遺詔而燕王檀自知南朝軍國豈理邪下令延壽親黨皆釋不問

綱目丁未

晉天福十二年

春正月契丹德光入大梁廢晉主重貴爲負義

侯二月契丹行朝賀禮以趙延壽爲中京留守四月契丹耶律德光死于殺胡林契丹趙延壽入恒州自稱權知南朝軍國事五月契丹元欲執趙延壽而自立

天台胡氏曰趙延壽之求爲帝不得不止此其所以終爲元欲所囚也元欲不與諸門管鍵事可知矣延壽殊不知陰爲之備其囚固宜

趙贊幽州薊人本名匡贊延壽之子母唐主女興平公主匡贊幼聰慧唐主甚愛之與諸子外孫並育於六宅暇日因遍閱諸孫數十人

曰匡贊曰是兒令器也匡贊七歲誦書二十七卷應神童舉唐主詔曰都尉之子太尉之孫幼能誦書弱不好弄克彰庭訓宜錫科名可特賜童子及第仍附長興三年禮部春榜久之延壽出鎮宣武因奏署牙內都校及契丹立石敬瑭爲晉帝引兵南下德均父子降晉契丹主盡錮之北去匡贊獨與母公主留洛晉天福丁酉契丹取匡贊母子以北署匡贊爲金吾將軍數年契丹以延壽爲范陽節度又署匡贊爲牙內都校開運末契丹南侵陷平原署匡贊爲河中節度延壽得留鎮河中丁未正月契丹滅晉以延壽爲中京留守匡贊爲護國節度使及延壽爲元欲所囚而劉知遠已稱帝於晉陽遣使至河中諭之仍以遼囚其父告之匡贊奉表勸進六月知遠入大梁晉之藩鎮相繼來降改國號曰漢加匡贊檢校太尉七月或傳延壽已死

郭威言於漢主曰趙匡贊契丹所署今猶在河中宜遣使吊祭因起復移鎮彼旣家國無歸必滅恩承命從之乃徙匡贊爲晉昌節度使後二年延壽契丹卒於十月匡贊至長安恐終不爲朝廷所容乃遣使降蜀自終南山路出兵應援十二月鳳翔節度使侯益亦降於蜀與匡贊同上表請出兵平定開中乾祐戊申正月漢主以匡贊侯益與蜀兵共爲寇患之會回鶻入貢訢稱爲黨項所阻乞兵應接詔王景崇等將禁軍數千赴之因使之經略關西晉昌節度判官李恕久在延壽幕下延壽使之佐匡贊匡贊將入蜀恕諫曰燕王入朝豈所願哉今漢家得天下方務招懷若謝罪歸朝必保富貴入蜀非全計也蹄涔不容尺鯉公必悔之匡贊乃遣恕奉表請入朝景崇等未行而恕至漢高主問恕匡贊何爲附蜀對曰匡贊自以身受虜官父在



虜庭恐陛下未之察故附蜀求苟免耳臣以為國家必應存撫故遣  
臣來祈哀漢主曰匡贊父子本吾人也不幸陷虜今延壽方墜檻穽  
吾何忍更害匡贊乎即聽其入朝侯益亦請赴聖壽節上壽匡贊不  
俟李恕返命已離長安丙子入見漢主尋殂子承祐立以匡贊為左  
驍衛上將軍周主榮征淮南贊以戰功多授保信軍節度使宋初加  
檢校太師移鎮延州又徙鄜州太宗即位進封衛國公  
綱目丁未秋七月漢晉節度使趙匡贊叛降于蜀戊申漢乾祐元春正  
月趙匡贊侯益叛蜀還漢  
劉氏曰叛漢罪也還漢正也必書叛蜀何懲反覆也率然而去  
率然而還以是為反覆故再書反

學海君道部卷之九十七

學海君道部卷九十八

世系類九十

強藩年代門十

宋初藩鎮篇

湖南三氏章

劉言廬陵人楚王希廣時為辰州刺史庚戌冬馬希萼攻潭州廢希  
廣而自立辛亥正月郭威篡漢為周二月希萼命朗州靜江指揮使  
王逵副使周行逢帥所部兵治府舍士卒皆怨逵等遂帥眾逃歸朗  
州廢留後馬光贊奉馬光惠為節度使六月廢光惠送於唐推言權  
武平留後九月潭州將徐威等作亂執希萼幽之衡山立希崇為武  
安留後十月唐遣邊鎬將兵擊楚而希崇降唐以鎬為武安節度使

遷馬氏之族於金陵壬子十月言遣王逵等攻潭州邊鎬棄城走言  
遂取湖南奉表於周乞移使府治朗州癸丑正月周以言爲武平節  
度制置武安靜江等軍事王逵爲武安節度使周行逢爲武安行軍  
司馬三月逵襲破朗州執言殺之初朗州人謂劉言爲劉黻牙馬氏  
將亂湘中童謠云馬去不用鞭齧牙過今年及邊鎬俘馬氏鎬爲劉  
言所逐而言亦被害言鎮湖南凡三年

王逵襲破朗州殺劉言乃遣使上表於周且請復移使府治潭州逵  
還長沙以周行逢知朗州事甲寅五月逵更徙治朗以行逢知潭州  
丙辰二月周詔逵攻唐鄂州岳州團練使潘叔嗣西襲朗州逵還戰  
敗死逵鎮湖南凡三年

周行逢朗州武陵人少無賴不事產業嘗犯法配隸鎮兵以驍勇累

遷裨校王逵鎮朗州以行逢爲武清節度使知潭州事潘叔嗣殺王

逵乃歸岳州使將吏迎行逢入朗州行逢自稱武平武安留後兼有潭朗

告於周遂誘叔嗣執而斬之周以行逢爲武平節度制置武安靜江

等軍事宋初加兼中書令壬戌十月卒追封汝南郡王

周保權行逢子初爲武安節度副使行逢卒保權年十一宋詔以爲

節度使衡州刺史張文表怒曰我與行逢俱起微賤立功名今日安

能北面事小兒乎遂襲潭州據之保權遣楊師璠擊之且求援於宋

癸亥正月宋遣慕容延釗李處耘假道荆南討文表未至楊師璠已

破文表殺之處耘襲取荆南延釗進克潭州保權遣兵逆戰敗於澧

江宋師遂克朗州獲保權以歸周氏鎮湖南凡七年

泉州二氏章

留從效泉州永春桃林人幼孤事母兄以孝弟聞頗知書好兵法閩

主曦時為泉州指揮使甲辰晉開運元三月朱文進弑曦而自立署黃紹

頗為泉州刺史十一月從效與陳洪進執紹頗斬之請王繼勳主軍

府乙巳七月唐滅閩諸州皆降丙午二月從效逐繼勳而代之唐主

景以從效為泉州刺史其後建泉州為清源軍以從效為節度使累

官中書令封晉江王宋初稱藩貢奉不絕壬戌四月卒兄從願子紹

鏐嗣年幼典留務牙將陳洪進執之送於唐留氏鎮泉州凡十七年

陳洪進泉州仙遊人幼有壯節頗讀書習兵法及長以材勇隸兵籍

留從效時為統軍使從效卒洪進執其子紹鏐推副使張漢思為留

後自為副使癸亥四月幽漢思而代之請命於宋宋改清源為平海

軍以洪進為節度使太宗太平興國二年戊寅三月洪進來朝獻潭  
泉州詔授洪進武寧節度使留汴京累封岐國公據泉州十六年

瑋拒命唐主遣張敬達攻之不克契丹主將兵救之圍唐兵於晉安

唐主自將次懷州遣彥饒帥侍衛軍赴潞州為大軍後援諸軍自鳳

翔推戴以來驕悍不為用彥饒恐其為亂不敢東之以法唐主至河

陽而契丹主立石敬瑋為晉帝楊光遠殺張敬達以降契丹以晉主

南下唐主還洛陽自焚死晉主入洛陽以楊光遠代彥饒將親軍徙

彥饒義成節度使丁酉二月范延光反於魏渡河焚草市詔白奉進

以侍衛兵三千屯滑州白馬津以備之軍士有夜掠者捕之獲五人

其三隸奉進其二隸彥饒奉進皆斬之彥饒以為不先白已甚怒明

日奉進從數騎詣彥饒謝彥饒曰軍中各有部分奈何取滑州軍士

并斬之殊無主客之義乎奉進曰軍士犯法何有彼我僕已引咎謝

公而公怒不解豈非欲與延光同反邪拂衣而起彥饒不留帳下甲

士大譟擒奉進殺之從騎走出大呼於外諸軍爭擐甲操兵誼譟不可禁止軍奉國左廂都指揮使馬萬惶惑不知所爲帥步兵欲從亂遇右廂都指揮使盧順密帥步兵出營厲聲謂萬曰符公擅殺白公必與魏城通謀此去行宮纔二百里吾輩及軍士家屬皆在大梁奈何不思報國乃欲助亂自求族滅乎今日當共擒符公送天子立大功軍士從命者賞違命者誅勿復疑也萬所部兵尚有呼躍者順密殺數人衆莫敢動萬不得已從之與方太等共攻牙城執彥饒送大梁敕斬彥饒於班荆館其兄弟皆不問

綱目丙戌

唐同光四

夏六月唐汴州軍亂指揮使李彥饒計平之丁酉

晉天福二

秋七月晉義成節度使符彥饒舉兵反指揮使盧順密計平

之

五代史本傳曰彥饒與晉初無釁隙以一旦之忿不能馭其軍殺奉進已非其本意以反見誅非其罪也

胡氏曰符彥饒攝於汴而亂於滑豈當時將士驕倍習以成俗彥饒久而與之俱化耶

卮言曰符彥饒非反也而綱目書反是全以天子之事予晉也與前後書法不同

符彥卿存審次子也年十三能騎射事唐主存勗於太原以謹愿稱出入臥內及長以爲親從指揮使入汴遷散員指揮使唐主亶時歷慶州刺史清泰初改易州晉天福初授同州節度兄彥饒亦鎮滑俄而彥饒叛彥卿上表待罪晉主釋不問改鎮鄜延晉主重貴幼與彥卿狎即位召還出鎮河陽二城從李守貞討平楊光遠移鎮譚州封

析國公改鎮徐州反杜重威以大軍降遼詔彥卿與高行周領兵屯  
澶淵會張彥澤引遼兵入汴彥卿等遂歸遼遼主遣還鎮漢主知遠  
入汴來朝改鎮兗州拜守太保封魏國公又移青州周主威慕漢封  
彥卿淮陽王移鎮鄆州及王殷得罪乃以彥卿爲大名尹天雄軍節  
度使進封韓王周主榮嗣位拜太傅改封魏王周主宗訓時加守太  
尉宋太祖代周禰帝加守太師建隆四年春來朝襲衣玉帶開寶二  
年六月移鳳翔節度被病肩與赴鎮至西京上言疾亟請就醫洛陽  
從之役滿百日猶請其奉爲御史所劾下留司御史臺宋主以姻舊  
特免推鞠止罷其節制八年六月卒年七月十八喪事官給彥卿將  
家子勇略有謀善用兵前後賞賜鉅萬悉分給帳下故士卒樂爲効  
死遼人自陽城之敗尤畏彥卿或馬病不飲齧必唾而呪曰此中豈  
有符王邪晉少主旣陷契丹德光之母問左右曰彥卿安在或對曰  
聞其已遣歸徐州矣德光母曰留此人中原何失策之甚其威名如  
此鎮大名餘十年政委牙校劉思遇貪黠怙勢歛貨財公府之利多  
入其家彥卿不之覺時藩鎮率遣親吏受民租槩量增溢公取其餘  
羨而魏郡尤甚宋主聞之遣常參官主其事由是斛量始平詔以羨  
餘粟賜彥卿以愧其心

卮言曰五季時相如馮道將如符彥卿真所謂倚市門乞幡間者  
張從賓初事後唐爲朔方節度使晉天福丁酉四月晉主遷都汴州  
以從賓爲東都巡檢使六月范延光反於魏州晉主以從賓爲副部  
署兼諸軍都虞侯發河南兵數千人以擊延光延光使人誘從賓從  
賓遂與之同反殺晉主子河陽節度使重信使張繼祚知河陽留後

從賓又引兵入洛陽殺晉主子權東都留守重又以副留守張延播知河南府事使從軍取內庫錢帛以賞部兵留守判官李遐不與兵衆殺之從賓引兵扼汜水關將逼汴州晉主詔侯益帥禁兵五千會杜仲威討之七月從賓攻汜水殺巡檢使宋延浩晉主戎服嚴輕騎將奔晉陽以避之桑維翰叩頭苦諫曰賊鋒雖盛勢不能久請少待之不可輕動晉王乃止范延光遣使以蠟丸招誘失職者婁繼英及尹暉在大梁温韜之子延濬等居許州皆應之繼英暉事泄出走暉爲人所殺繼英奔許州節度使萇從簡盛爲之備延濬等不得發遂與繼英同奔汜水繼英勸從賓執三温皆斬之杜重威侯益引兵至汜水遇從賓衆萬餘人與戰浮斬殆盡遂克汜水從賓走渡河溺死獲其黨張延入播繼祚送大梁斬之滅其族

綱目丁酉

晉天福二

夏六月晉魏府部署張從賓反河陽入東都秋七

月張從賓攻晉汜水關晉杜重威等克汜水張從賓伏誅

劉氏曰溺死書伏誅何惡從賓也從賓本擊延光乃所爲所誘而反至殺皇子二人其罪大矣故正其罪

尹氏曰方書范延光反繼書張從賓反未幾又書符彥饒反是何反者之多且易也投降賣國以利誘人得旣以此失亦以此晉之所以不即亡者亦幸耳

李金全其先出於吐谷渾金全少爲唐主嗣源廝養以驍勇善騎射常從嗣源戰伐以功爲刺史天成中爲彰武軍節度使在鎮務爲貪暴罷歸獻馬數十匹居數日又以獻唐主謂曰卿患馬多耶何進獻之數也且卿在涇州治狀如何無乃以馬爲事乎金全慙不能對徒

鎮橫海久之罷爲右衛上將軍天福丁酉七月安州指揮使王暉聞  
范延光作亂殺節度使周瓌自領軍府欲俟延光勝則附之敗則渡  
江奔吳晉主遣金全將千騎如安州巡檢下詔書招暉曰暉降以爲  
唐州刺史又以信箭諭安州不戮一人且戒金全曰無失吾信金全  
未至襄州安從進意揮必走江南以精兵遮其要路暉聞金全來果  
大掠安州南走爲部將胡進所殺金全至安州將士之預於亂者數  
百人金全說諭悉遣詣闕旣而聞指揮使武彥和等數十人挾賄甚  
多伏兵于野執而殺之彥和且死呼曰王暉首亂天子猶赦之我輩  
曾從何罪乎若朝廷之命何以示信苟將軍違詔而殺降亦將不免  
也晉主雖知金全之情掩而不問即以金全爲安遠節度使金全以  
親吏胡漢筠爲中門使軍府事一以委之漢筠貪猾殘忍聚斂無厭

晉主聞之以廉吏賈仁沼代之且召漢筠欲授以他職庶保全功臣  
漢筠大懼始勸金全以異謀金全表漢筠病未任行其故人龐令圖  
屢諫曰仁沼忠義之士以代漢筠所益多矣漢筠夜遣壯士踰垣滅  
令圖之族又毒仁沼舌爛而卒漢筠遂與推官張緯相結以誣惑金  
全金全愛之彌篤庚子五月胡漢筠旣違詔命不詣闕又聞賈仁沼  
二子欲訴諸朝反除馬全節鎮安州代金全漢筠給金全曰進奏吏  
遣人倍道來言朝廷俟公受代即按賈仁沼死狀以爲必有異圖金  
全大懼漢筠因說金全拒命自歸於唐金全從之晉主聞金全叛命  
馬全節以諸鎮兵討之金全遣推官張緯奉表請降於唐唐主遣李  
承裕等將兵三千逆之承裕等至安州金全將麾下數百人詣唐軍  
妓妾資財皆爲承裕所奪承裕入據安州馬全節進軍與戰城南大

破之承裕掠安州南走金節入安州虜承裕及其衆悉斬之金全至金陵唐主待之甚薄後以爲天威統軍潤州節度使漢隱帝時李守貞反河中乞兵於唐唐主遣金全與查文徽等出沐陽金全獨謂遠不相反不可行乃止其後亦不復用不知其所終

綱目丁酉

晉天福二

秋七月晉安州亂討平之晉安遠節度使李金全

殺其中門使賈仁沼庚子夏五月晉李金全以安州叛降于唐晉遣馬全節討之唐師敗績

卮言曰綱目書安州亂討平之不書李金全畧之也下書云安遠節度使李金全則金全之得安州可知矣後書云李金全以安州叛削其官也而分註亦不載其節鉞之命何哉且金全貪賄殺降拒命失信其罪大矣而不見誅於史筆何以爲後世戒乎信乎分注非朱子筆也

安從進振武素葛部人祖父皆事唐爲騎將從進初從唐主存勗於兵間爲護駕馬軍都指揮使領貴州刺史唐主亶時爲保義彰武軍節度使未嘗將兵征伐李彝超自立於夏州從進嘗一以兵徃攻之卒亦無功唐主從厚嗣位徙領順化爲侍衛馬軍都指揮使潞王從珂反鳳翔從進巡檢京城殺樞密使馮贇送款於從珂唐主出奔從珂將至洛從進率百官班迎於郊從珂遂入弒唐主從厚而自立清泰乙未以從進爲山南東道節度使唐丙申十月契丹立石敬瑭爲晉皇帝引兵南下唐主從珂自焚死晉主入洛陽丁酉四月遷都汴州七月安州將王暉作亂晉主遣李金全討之從進恐暉奔吳遣行軍司馬張朏將兵會復州兵於要路邀之暉遂爲部將所殺從進加



同平章事從進恃其儉固陰蓄異謀擅邀取湖南貢物招納亡命增  
廣甲卒陰結鎮州安重榮相爲表裏晉主患之謀誅從進庚子三月  
晉主使人謂從進曰東平王建立來朝願還鄉里已徙上黨朕虛青  
州以待卿卿有意則降制從進對曰若移青州至漢南臣即赴鎮晉  
主亦不之責其子弘超爲宮苑副使居京師從進請賜告遂不遣王  
令謙潘知麟者皆從進牙將也常從從進最久知其必敗切諫之從  
進遣子弘超與令謙遊南山酒酣令人推墮崖死辛丑四月從進謀  
反遣使奉表詣蜀請出師金商以爲聲援蜀主辭之又求援於荆南  
高從誨從進書諭以禍福從進怒反誣奏從誨從誨具奏其狀且  
請發兵助朝廷討之辛丑六月安重榮執殺契丹使者反迹見晉主  
爲之幸鄴鄭王重貴留守京師宰相和凝請曰車駕已行安從進必  
反請密留空名宣敕十數通付留守鄭王聞變則書諸將名遣擊之  
晉主從之從進聞晉主北遂殺知麟以反鄭王以空名勅授張從恩  
等使討之十一月詔遣高行周討從進引兵攻鄧州安審暉據牙城  
拒之從進不能克而退癸未從進至花山遇張從恩兵不意其至之  
速合戰大敗從恩獲其子牙內都指揮使弘義從進以數十騎遁  
襄州嬰城自守十二月晉主以高行周知襄州行府事詔荆南湖南  
共討襄州高從誨遣李端將水軍數千至南津楚王希範遣張少敢  
戰艦入漢江以助行周仍各運糧以饋之從進遣其弟從貴將兵逆  
均州刺史蔡行遇焦繼勳邀擊敗之獲從貴斷其足而歸之甲寅八  
月高行周圍襄州踰年不下城中食盡王清與劉詞帥衆先登拔之  
從進舉族自焚凡據襄州八年

綱目辛丑

天福八年

十一月晉山南東道節度使安從進舉兵反十一

月荆南湖南會晉師討襄州壬寅秋八月晉討襄州拔之安從進  
伏誅

天台胡氏曰晉祖非姑息之主也慊然內顧其所以取中原者  
而思其所以守中原者畏首畏尾故諸鎮之鴛鴦者皆俛眉而  
撫馴之

安重榮朔州人祖從義利州刺史父全勝州刺史振武馬步軍都指  
揮使重榮有力善騎射唐主從珂時爲振武巡邊指揮使戊代北天  
福丙申五月石敬瑭舉兵反使使招之重榮帥步騎五百奔晉陽敬  
瑭以爲北面招收指揮使十月契丹立石敬瑭爲晉帝唐主從珂自  
焚死晉主入洛陽天福丁酉正月以重榮爲成德節度使重榮起於

行伍暴至富貴而見唐主從珂晉主敬瑭皆自藩侯得國嘗謂人曰  
天子寧有種耶兵強馬壯者爲之爾雖懷異志而未有以發也是時  
晉主與契丹約爲父子契丹驕甚晉主奉之愈謹重榮憤然數以非  
誚晉主天福辛丑六月契丹使者過鎮州重榮侵辱之使者言不遜  
重榮執之上表請伐契丹晉主不許重榮得詔愈驕聞安從進有異  
志陰遣使與之通謀晉主憂重榮跋扈乃以劉知遠爲河東節度使  
知遠至鎮遣親將郭威以詔指說吐谷渾酋長白承福令去重榮歸  
朝廷許以節鉞威還謂知遠曰虜惟利是嗜安鐵胡止以袍袴賂之  
今欲其來莫若重賂乃可致耳知遠從之十月承福帥衆歸于知遠  
始重榮移檄諸道云與吐谷渾韃靼契苾同起兵旣而承福降知遠  
韃靼契苾亦莫之赴重榮勢大沮十一月安從進反重榮聞之反謀

益決大集境內饑民衆至數萬南向鄴都聲言入朝晉主聞之遣杜重威等討之戊戌重威與重榮遇於宗城西南重榮爲偃月陳官軍再擊之不動重威懼欲退之王重胤曰兵家忌退鎮之精兵盡在中軍請公分銳士擊其左右翼重胤爲公以契丹直衝其中軍彼必狼狽重威從之鎮人稍却重榮匿於輜重中官軍從而乘之鎮人大潰斬首萬五千級重榮收餘衆走保中城官軍進攻夜分拔之重榮以十餘騎走還鎮州嬰城自守會天寒鎮人戰及凍死者二萬餘人壬寅正月丁巳鎮州牙將自西郭水碾門導官軍入城殺守陴民二萬人執重榮斬之杜仲威殺導者自以爲功庚申重榮首至鄴都晉主命漆之函送契丹改鎮州爲恒州重榮據鎮州凡六年

綱目辛丑

天福六年

夏六月晉成德節度使安重榮執契丹使者上表

請伐契丹十二月晉安重榮反晉遣杜仲威擊敗之壬寅春正月晉師入鎮州安重榮伏誅

卮言曰安重榮以鎮州反即晉主之以晉陽反耳其耻臣契丹殺其使而請伐之蓋猶有中國之氣焉異乎晉主之臣虜篡唐者矣重榮敗死而晉主乃函首以送契丹此媚虜之罪不甚於拒命之罪乎而綱目以重榮伏誅爲文者臣反君之常詞也若云上表請伐契丹則固已予之矣愚謂晉時諸藩鎮叛者雖殺其詞可也

方太初爲奉國都虞候天福丙申七月符彥饒擅殺白奉進於滑州太從盧順密等共攻牙城執彥饒送大梁斬之以太爲趙州刺史丙午十二月遼主入恒州太降於遼遼主以族人麻答代之丁未正月

遼主滅晉以太領武定節度使二月劉知遠稱帝於晉陽三月遼主  
北歸遣太詣洛陽巡檢至鄭州州有戍兵共迫太爲鄭王梁嗣密王  
朱乙逃歸爲僧嵩山賊帥張遇得之立以爲天子取嵩岳神袞以  
衣之帥衆萬餘襲鄭州太擊走之太以遼尚彊恐事不濟說諭戍兵  
欲與俱西衆不從太自西門逃奔洛陽戍兵旣失太反譖太於遼云  
脅我爲亂太遣子師朗自訴於遼遼將麻答殺之太無以自明會群  
盜攻洛陽遼留守劉晞棄城奔許州太乃入府行留守事與巡檢使  
潘環擊群盜却之張遇殺朱乙請降伊闕賊帥自稱天子誓衆於南  
郊壇將入洛陽太逆擊走之太欲自歸於晉陽河陽武行德使人誘  
太白我裨拔也公舊鎮此地今虛位相待太信之至河陽爲行德所  
殺觀行德之言是遼嘗命  
太鎮河陽史逸之也

卮言曰石敬瑭乘唐之亂稱臣契丹以代唐業不數年而叛者九  
起身死未寒而國滅家亡得之易宜其失之易也是時藩鎮雖名  
爲臣屬實亦羈縻而已拒命擁兵何足深罪而杜威以貴戚握重  
權首附契丹以滅中原滔天之罪此其最也故不系於此而系之

亂賊篇

漢鎮將章

侯益汾州平遙人祖父以農爲業初李克用據太原益以拳勇隸麾  
下從唐主存勗攻討先登遷軍使唐末累遷行營都巡檢使晉天福  
初晉主召爲奉國都校張從賓據河陽益擊殺之拜河陽節度移鎮  
潞州已酉七月移鎮徐州庚子徙秦州晉主重貴立以益爲河中尹  
護國節度使丁未契丹入大梁益率衆歸之契丹主以益爲鳳翔節

度僂漢主劉知遠稱帝 加益兼侍中益自以嘗受契丹命聞漢主  
立而懼乃叛降于蜀漢主遣王景崇經畧關中而趙匡贊奉表請入  
朝益亦請赴聖壽節上壽景崇引兵至鳳翔益尚未行景崇以禁兵  
分守諸門或勸景崇殺益景崇未決益聞之不告景崇而去益入朝  
而漢主已殂子承祐立益富於財厚賂執政及史弘肇等乃以益爲  
開封尹兼中書令封魯國公益盛毀王景崇於朝言其恣橫景崇不  
自安會詔遣供奉官如鳳翔徵牙兵詣闕趙思綰懼景崇以言激之  
思綰遂據長安以叛李守貞亦以同州反六月景崇叛降于蜀九月  
景崇盡殺益家屬七十餘人益子前天平行軍司馬仁矩先在外得  
免仁矩子延廣尚在襁褓乳母劉氏以己子易之抱延廣而逃乞食  
至大梁歸于益家庚戌十一月郭威舉兵反漢主承祐遣益及慕容  
彥超等討之與威戰赤崗不利益夜見威威遣還營漢主彼殺于趙  
村威入大梁辛亥正月威篡位國號周以益爲太子太師進封楚國  
公改封齊顯德甲寅冬告老致仕歸洛遣使賜茶藥錢帛就<sub>江</sub>問之  
宋祖即位遣賜器幣歲一來朝宋王以耆舊厚待之乾德初郊祀詔  
綴中書門下班禮與丞相等

綱目丁未

晉天福十二年

十二月漢鳳翔節度使侯益叛降于蜀戊申

漢乾

祐春正月漢侯益叛蜀還漢三月漢以侯益爲開封尹

宋史論曰侯益在晉漢間數爲反覆觀其受命契丹私交僞蜀亦  
岡之戰復夜謁周祖宗屬長幼遭景崇鯨鯢殆無噍類推其心迹  
豈懷貳之罰歟

卮言曰侯益數爲反覆人臣之極兇國家之大賊也雖族殲于王

景崇足爲悖凶之應而克全首領終保爵祿爲幸多矣彼昏庸之朝其獲容身固無足怪宋祖英主亦加優禮不已過乎

李守貞河陽人晉主敬瑭鎮河陽以爲客將其後常從征伐敬瑭稱帝以守貞爲宣徽使晉主重貴立楊光遠反召契丹入寇守貞領義成軍節度從幸澶州破契丹兵徙領泰寧軍節度以功拜同平章事契丹入寇晉主再幸澶州杜仲威爲招討使守貞爲都監契丹至真定守貞與仲威降契丹入大梁滅晉以守貞爲天平節度契丹北歸劉知遠稱帝于晉陽入大梁國號漢守貞入朝拜太保河中節度使戊申正月漢主知遠殂子承祐立守貞聞杜仲威死而懼陰有異志自以晉世嘗爲上將有戰功素好施得士卒心漢室新造天子年少初立執政皆後進有輕朝廷之志乃招納亡命養死士治城塹繕甲

兵遣人間道結契丹屢爲邊吏所獲會趙思綰據長安奉表獻御衣於守貞守貞乃自稱秦王遣其驍將王繼勳據潼關四月漢景崇以鳳翔叛降于蜀漢主遣郭從義討趙思綰白文珂等討守貞六月王景崇又以鳳翔叛降于蜀亦受守貞官爵三鎮連衡諸將討之久無功八月漢以郭威爲西面招慰安撫使威與諸將議攻討諸將欲先取長安鳳翔扈彥珂曰今三叛連衡推守貞爲王守貞亡則西鎮自破矣威善之於是三道攻河中圍之守貞屢出兵欲突長圍皆敗而返遣人齎蠟丸求救於唐蜀契丹皆爲邏者所獲城中食且盡殍死者日衆十月守貞遣使間道奉表求救於唐唐主命李金全將兵救之軍于海州勢不相及而蜀兵之救鳳翔者敗漢兵於散關郭威引兵赴之蜀兵引還威將至河中守貞遣王繼勳等引精兵千餘人襲

漢柵劉詞帥衆擊之河中兵退走死者七百人繼勲重傷僅以身免  
四月河中城中食且盡民餓死者什伍六守貞出兵攻長圍郭威遣  
吳虔裕引兵橫擊之河中兵敗走奪其攻具五月守貞復出兵又敗  
之擒其將魏延朗繼勲帥衆千餘人降威威乘其離散督諸軍百道  
攻之五月趙思綰降漢郭從義殺之威攻河中克其外郭守貞收餘  
衆退保子城諸將請急攻之壬戌守貞與妻反子崇勳等自焚威入  
城獲其子崇玉等及所署丞相靖崧孫愿樞密使劉苦國師總倫等  
送大梁磔於市

綱目戊申

漢乾祐元年

春二月漢李守貞反己酉秋七月漢郭威克河

中李守貞自殺

王景崇邢州人事晉王爲引進使累遷金吾大將軍嗣源鎮邢州以  
爲牙將嗣源立爲唐主拜通事舍人歷引進閣門使契丹滅晉唐許  
王從益自立于大梁以爲宣徽使劉知遠禰帝于晉陽景崇奔迎旣  
入大梁拜右衛大將軍漢乾祐戊申正月趙匡贊侯益與蜀兵共爲  
寇漢主患之會回鶻入貢訴稱爲党項所阻乞兵應接詔景崇乘將  
軍齊藏珍將禁軍數千赴之因使之經畧關西景崇未行而匡贊益  
奉表請入朝景崇將行漢主召入臥內敕之曰匡贊益之心皆未可  
知汝至彼已入朝則勿問若尚遷延顧望當以便宜從事是月丙子  
匡贊自長安入見景崇至長安聞蜀兵已入秦川以兵少發本道及  
匡贊牙兵千餘人同拒之蜀將李廷珪將至長安聞匡贊已入朝欲  
引歸景崇邀之敗廷珪於子午各張處劉至寶雞按兵未進侯益聞  
廷珪西還因閉壁拒蜀兵虔釗勢孤引兵夜遁景崇帥鳳翔隴郿涇

鄜坊之兵追敗蜀兵於散開俘將卒四百人是月漢主殂二月周王承祐立詔以景崇兼鳳翔巡檢使景崇至鳳翔侯益尚未行景崇以禁兵分守諸門或勸景崇殺益景崇以受先朝密旨嗣主未之知或疑於專殺猶豫未決益聞之不告景崇而去景崇誨自詬益入朝厚賂執政以益兼中書令行開封尹益盛毀景崇於朝言其恣橫景崇聞益尹開封知事已變內不自安且怨朝廷會詔遣供奉官王益如鳳翔徵趙匡贊牙兵詣闕趙思綰等甚懼景崇因以言激之恩綰至長安入據其城節度副使安等規等皆逃去景崇諷鳳翔吏民表景崇知軍府事朝廷患之以景崇為邠州留後令便道之官四月景崇遷延不之邠州閱集鳳翔丁壯詐言討趙思綰仍牒邠州會兵景崇欲并岐邠之又遺蜀鳳州刺史徐彥書求通互市蜀主使彥復書招之六

月景崇遣使請降于蜀亦受李守貞官爵七月趙暉至長安表景崇反狀益明請進兵擊之八月遣郭威督諸軍討三鎮詔趙暉趨鳳翔蜀以景崇為岐陽節度使同平章事遣兵援景崇軍于散開趙暉遣都監李彥從襲擊破之蜀兵遁去十月景崇遣其子德讓思綰遣其子懷乂見蜀主于成都戊寅景崇遣兵出西門趙暉擊破之遂取西關城景崇退守大城塹而圍之數挑戰不出暉潛遣千餘人擐甲執兵聲言蜀兵且至景劾蜀旗幟循南山而不令諸軍聲言蜀兵且至景崇果遣兵數千出迎之暉設伏掩擊盡殪之自是景崇不敢復出蜀主遣安思謙將兵救之不克退歸興元十一月景崇告急于蜀蜀主命安思謙再出兵救之思謙自興元進屯散關敗漢兵於玉女潭趙暉告急於郭威威自往赴之威至華州聞蜀兵食盡引去威乃



還已酉五月趙思綰降郭從義殺之郭威克河中李守貞自殺十二月趙暉急攻鳳翔周璨謂景崇曰公曷與蒲雍相表裏今二鎮已平蜀兒不足恃不如降也景崇曰善吾更思之後數日外攻轉急景崇謂其黨曰事窮矣吾欲爲急計乃謂其將公孫輦張思練曰趙暉精兵多在城北來日五鼓前爾二人燒城東門詐降勿令寇入吾與周璨以牙兵出北門突暉軍縱無成而死猶勝束手皆曰善己未明輦思練燒東門請降府牙火益發二將遣人訶之景崇已與家人自焚矣璨亦降

綱目戊申

漢乾祐元

春二月漢以王景崇爲鳳翔巡檢使夏五月王景崇叛降于蜀己酉十二月漢趙暉攻鳳翔王景崇自殺

趙思綰魏州人初爲河中趙匡贊牙將漢初從匡贊徙永興乾祐戊申二月趙匡贊自長安入朝王景崇至長安聞蜀兵已入秦川以兵少發本道及匡贊牙兵千餘人拒之景崇恐匡贊牙兵亡逸欲文其面微露風旨思綰首請自文其面以帥下景崇悅齊藏珍竊言曰思綰凶暴難制不如殺之景崇不聽思綰敗蜀兵於子午谷又敗之散開及詔徵牙兵詣闕思綰等甚懼景崇因以言激之思綰途中謂其黨常彥卿曰小太尉已落其手吾屬至京師并死矣奈何彥卿曰臨機制變子勿復言癸酉至長安永興節度副使安友規巡檢喬守溫出迎王益置酒於客亭思綰前白曰壕寨使已定舍館於城東今將士家屬皆在城中欲各入城挈家詣城東宿友規等然之時思綰等皆無鎧仗旣入西門有州校坐門側思綰遽奪其劍斬之其徒因大譟持白刃殺守門者十餘人分遣其黨守諸門思綰入府開庫取鎧

伏給之友規等皆逃去思綰遂據城集城中少年得四千餘人繕城  
隍葺樓堞旬日間戰守之其皆備虢州伶人靖邊庭殺團練使田令  
方驅掠州民奔思綰至潼關守將擊之其衆皆潰思綰遣使奉表獻  
御衣於河中李守貞守貞乃自稱秦王以思綰爲晉昌節度使四月  
以鎮寧郭從義充永興行營都部署將侍衛兵討思綰七月復遣郭  
威督諸道兵討三鎮已酉春郭威圍李守貞河中屢敗其兵思綰好  
食人肝嘗面剖而膾之膾盡人猶未死又好以酒吞人膽謂人曰吞  
此千枚則膽無敵矣及長安城中食盡取婦女幼稚爲軍糧日計數  
而給之每犒軍輒屠數百人如羊豕法思綰計窮不知所出郭從義  
使人誘之初思綰少時求爲將軍李肅僕肅不納曰是人目亂而語  
誕它日必爲叛臣肅妻張氏曰君今拒之後且爲患乃厚以金帛遺  
之及思綰據長安肅閑居在城中思綰數就見之拜伏如故禮肅曰  
是子亟來且汗我欲自殺妻曰曷若勸之歸國會思綰問自全之計  
肅乃與判官陳讓能說思綰曰公本與國家無嫌但懼罪耳今國家  
三道用兵俱未有功若以此時翻然改圖朝廷必喜自可不失富貴  
孰與坐而待斃乎思綰從之遣使詣闕請降乙丑以思綰爲華州留  
後七月甲辰思綰釋甲出城受詔郭從義以兵守其南門復遣還城  
思綰求其牙兵及鎧仗從義亦給之思綰遷延收斂財賄三改行期  
從義等疑之密白郭威請圖之威許之壬子從義與都監王峻按轡  
入城處府舍召思綰酌別因執之并常彥卿及其父兄部曲三百人  
皆斬於市

綱目戊申

漢乾祐元

春三月漢徵鳳翔兵詣闕行至長安軍校趙思綰

據城作亂漢遣郭從義討之己酉夏五月趙思綰遣使請降于漢漢以爲華州留後秋七月漢郭從義誘趙思綰殺之

慕容彥超本吐谷渾部人與漢主知遠同母少事唐主嗣源爲軍校累遷刺史晉主敬瑭時爲濮州刺史以罪流房州下未契丹滅晉漢主穰帝于晉陽遂入大梁彥超逃歸拜鎮寧軍節度使會天雄節度杜仲威反於魏漢主遣彥超與高行周討之重威降徙彥超鎮天平加同平章事漢主知遠殂子承祐立庚戌三月彥超入朝徙爲泰寧節度使十一月郭威反漢主遣彥超等將兵拒之赤岡爲威所敗彥超敗奔還漢主承祐被殺于趙村辛亥正月郭威篡位國號周漢湘陰公贇故將鞏廷美等舉兵徐州二月周兵克徐州鞏廷美死之初周主慮彥超疑懼賜詔慰安之加兼中書令遣使諭指彥超上表謝

及聞徐州平疑懼愈甚乃招納亡命畜聚薪糧潛以書結北漢吏獲其書以聞又遣人作爲商人求援於唐周主遣通士舍人鄭好謙就申慰諭與之爲誓彥超愈不自安屢遣都押牙鄭麟詣闕僞輸誠款實覘機事又獻天平節度使高行周書其言皆謗毀朝廷與彥超相結之意周主笑曰此彥超之詐也以書示行周行周上表謝恩旣而彥超反跡益露丙申遣閣門使張凝將兵赴鄆州巡檢以備之彥超又奏請入朝周主知其詐即許之旣而復穰境內多盜未敢離鎮廣順壬子正月彥超發鄉兵入城引泗水注濠中爲戰守之備又多以旗幟授諸軍將令募群盜剽掠鄰境所在奏其反狀甲子敕沂密二州不復隸泰寧軍遣曹英向訓等將兵以討彥超唐主發兵五千軍于下邳以援之彥超聞周兵將至退屯沐陽徐州巡檢使張令彬擊

之大破唐兵初彥超以周室新造謂其易搖故北召北漢及契丹南誘唐人使侵邊鄙冀周人奔命不暇及北漢契丹自晉州北走唐兵敗於沐陽彥超之勢遂沮壬申曹英等至兖州築長圍彥超屢出戰藥元福皆擊敗之彥超不敢出十餘日長圍合遂進攻之初彥超將反判官崔周度諫曰魯詩書之國自伯禽以來不能霸諸侯然以禮義守之可以長世公於國家非有私憾胡爲自疑况主上開諭勤至苟撤備歸誠則坐享泰山之安矣獨不見杜中令安襄陽李河中竟何所臣乎彥超怒及官軍圍城彥超括士民之財以贍軍坐匿死者甚衆四月周主以曹英等久無功乃自將親征五月至兖州已巳使人招諭彥超城上人語不遜庚午命諸軍進攻元是術者給彥超云鎮星行至角亢兖州之分其下有福彥超乃立祠而禱之令民間皆立黃幡彥超性貪吝官軍攻城急猶瘞藏珍寶由是人無鬪志將卒相繼有出降者乙亥官軍克城彥超方禱鎮星祠帥衆力戰不勝乃赴鎮星祠與妻赴井死子繼勳出走追獲殺之官軍大掠城中死者近萬人

綱目辛亥

周廣順元

春正月漢秦寧軍節度使慕容彥超遣使入貢于

周壬子春正月周秦寧軍節度使慕容彥超反周發兵討之唐人救之不克周師圍兖州夏四月周主自將討兖州克之慕容彥超自殺

尹氏曰彥超書反因書討而唐人書救所以見唐人助逆之罪  
卮言曰漢於五季得國差正而周篡之慕容彥超不肯臣周安得爲反獨恨其志之雄而才之拙也使能聲郭威之罪而合河

東以討之豈不凜凜大義哉奈何束手受斃自同叛逆乎而綱目書反蓋以正統予周且既降而復叛抑以懲反覆耳

劉銖漢主嵩之族弟也初爲平盧節度使庚戌五月銖貪虐恣橫朝廷欲徵之恐其拒命因沂密用兵於唐遣沂州刺史郭瓊將兵屯青州銖不自安置酒召瓊伏兵幕下欲害之瓊知其謀悉屏左右從容如會了無懼色銖不敢發瓊因諭以禍福銖感服詔出即行庚戌銖入朝久奉朝請未除官常戟手於執政十一月漢主與李業等謀殺宰相楊邠史弘肇乃以銖權知開封府侍衛馬軍都指揮使業等命銖誅郭威王峻之家極其慘毒嬰孺無免者郭威舉兵反鄴都至封丘漢兵敗降漢主出奔於七里寨衆皆逃潰策馬將玄化門銖在門上問漢主左右兵馬何在因射左右漢主回轡至趙村爲追兵所弑郭威至玄化門銖兩射城外威自迎玄門入獲銖囚之銖謂其妻曰我死汝且爲人婢乎妻曰以公所爲雅當然耳威迎贊於徐州以太后臨朝銖及其黨皆梟首於市而赦其家郭威謂公卿曰劉銖屠吾家吾復屠其家怨讐反覆庸有極乎由是數家獲免

考異曰五代史闕文周祖自鄴起兵銖盡誅周祖之家子孫婦女數十數人極其慘毒及隱帝遇害周祖以漢太后令收銖下獄使人責銖殺其家對曰銖爲漢家戮叛族耳不知其他威怒殺之王禹偁曰周世宗朝史官脩漢隱帝實錄銖之忠言諱而不載銖今有子孝和擢進士第按銖所至貪婪酷虐在青州謀不受代賴郭瓊諭之始入朝私怨楊史快其就戮隱帝敗歸射而不納使至野死其屠滅周祖之家出於殘忍之性耳豈忠義之士耶王禹偁所

記蓋憑孝和之言耳今不取

綱目庚戌漢乾佑三冬十一月漢誅劉銖及其黨

劉氏曰綱目許例有二書伏誅者重辭也直書誅者快辭也劉銖直書誅而削其官甚快之之辭也趙村之變銖有力焉

卮言曰劉銖漢主之族也謀殺郭威而為威所殺雖非忠謀亦無逆節威既篡國何難加銖以罪史官所紀未盡直筆綱目亦因舊史以漢法誅之耳郭威書反則劉銖不宜書誅今以其青州拒命故系之此章

### 唐晉以後諸鎮將章

王章萊州掖人家世力田景少倜儻善騎射不事生業結里中惡少為群盜采大將王檀鎮滑臺以景隸麾下與唐主存勗滅梁入汴

景來降遷都虞侯晉主敬瑭稱帝景以所部歸晉授相州刺史開運丙午拜橫海軍節度漢乾祐初加同平章事周主郭威篡漢稱帝加兼侍中廣順辛亥景入朝徙鎮護國王子徙鎮鳳翔封褒國公周主榮立加兼中書令徙鎮秦州周主宗訓立進封涼國公宋初加守太保封太原郡王建隆辛酉春來朝徙鎮鳳翔癸亥卒

綱目乙卯周顯德二夏五月周遣鳳翔節度使王景伐蜀秋七月周王

### 景敗蜀師取秦階成州

王晏徐州滕人家世力田晏少壯勇無賴嘗率群寇行攻劫梁末徐方大亂屬邑皆為他盜所剽惟晏鄉里恃晏獲全後唐同光中應募隸禁軍累遷奉國小校晉開運末晏與趙暉侯章等戍陝州會契丹至汴遣其將劉愿據陝晏與暉等謀襲愿斬之眾請暉為保平軍節

度使表晏始謀功遷建雄軍節度使漢主劉知遠稱帝入汴加同平章事周主郭威稱帝加兼侍中廣順元年辛亥周主以晏家彭城授武寧軍節度封滕國公周主榮立加兼中書令顯德丙辰移鎮鳳翔宋太祖禪位進封趙國公徙鎮安遠乾德癸亥進封韓國公上章請老拜太子太師致仕

綱目甲辰

周顯德元

秋七月周徐州秦為節度使王晏立碑許之

侯章并州榆次人初在并門事後唐主存勗為隊長唐主嗣源遷為小校晉開運末章與趙暉王晏謀斬契丹將劉原漢主知遠以章為鎮國軍節度乾祐戊申加同平章事移鎮邠州加檢校太師周主威稱帝加開府階封申國公徙鎮鄧州廣順壬子十二月章入朝獻買宴絹千匹銀五百兩周主不受曰諸侯入覲天子宜有宴犒豈待買

耶自今如此比者皆不受周主榮立徙鎮武勝宋建隆庚申授太子太師進封楚國公

綱目壬子

周廣順二

十二月周靜難節度使侯章入朝

郭從義其先沙陀部人父紹古事晉王克用忠謹持見信任賜姓李氏紹古卒從義方壯角唐主存勗畜於宮中與諸子齒唐主嗣源與紹古同事晉王情好款洽狎及為帝以從義補內職晉天復初始復姓郭氏出為宿州團練副使丁內艱北歸遂家太原漢主知遠在鎮表為都虞侯及起兵從義首贊其謀累擢鎮寧節度使乾祐戊申四月趙思綰之叛從義率師圍之即以從義為承興節度使思綰誅以功加同平章事周廣順辛亥移鎮許州加檢校太師周主榮時來朝移鎮天平又移徐州以功加兼中書令宋乾德甲子徙鎮河中戊辰

以疾歸京師致仕卒

綱目戊辰漢乾祐元夏四月漢遣郭從義討趙思綰已酉秋七月漢郭從義誘趙思綰殺之

武行德并州榆次人身長九尺餘材貌奇偉家甚貧常採樵鬻之自給晉主敬鎮并州嘗獵郊外值行德負薪趨拱於道敬睹見其魁

岸又所負薪異常令力士更舉之俱不能舉頗奇之田留帳下晉主稱帝累遷寧國都虞侯開運丁未正月契丹至汴行德被獲偽請自效四月契丹以船載晉鎧仗沂河歸國命行德部送之至河陰行德與將士謀曰虜勢不能久留中國不若共逐其黨堅守河陽以俟天命之所歸者而臣之衆以為然即相與殺契丹監軍使會契丹守將崔廷勳以兵送耿崇美之潞州行德遂乘虛入據河陽時晉主知

已稱帝于晉陽行德遣弟行友奉蠟表詣晉陽知遠遂以行德為河陽節度使六月晉主知遠入大梁改國號漢乾祐中移鎮成德俄改終武廣順辛亥遷河南尹西京留守顯德甲寅周主榮立進封邢國公徙鎮徐州周主宗訓立進封宋國公宋初進封魏國公乾德癸亥冬移鎮安州入為太子太傅致仕卒

綱目丁未晉天福十二年夏四月以武行德河陽節度使

扈彥珂代州鴈門人幼事主建立以謹厚補晉天福中建立節制潞州卒遺表薦彥珂得補河東都押衙丁未契丹滅晉漢主知遠起太原以彥珂為鎮國節度使乾祐初河中李守貞永興趙思綰鳳翔王景崇並據城叛彥珂從郭威往討之至華州彥珂決計先征河中及河中平以功遷護國軍節度辛亥周主威篡漢加同平章事移鎮滑



州歲餘代歸後以太子太師致仕宋初卒

薛懷讓其先戎人徙居太原少勇敢喜戰鬥唐主存勗在鎮得隸帳下累歷軍職唐主嗣源時累遷絳州刺史晉主敬瑭天福中以討范延光改宿州團練使契丹攻之晉主重貴擇驍將守要郡以懷讓為洺州團練使契丹滅晉漢主知遠立懷讓歸漢漢主承佑立移鎮同州周主威稱帝加同平章事顯德戊午請老拜太子太師周主訓立封杞國公宋初卒

趙晁真定人初事杜仲威為列校重威誅屬郭威鎮鄴晁因委質麾下郭威篡漢為周以晁為作坊副使慕容彥超據兗州友以晁為行營步軍都監兗州平轉作坊使晁自以逮事霸府復有軍功而遷官不滿所望居常怏怏時樞密使王峻秉政晁疑其軋已一日使其弟毀峻峻不之責周主威殂周主榮立以晁為控鶴左廂都指揮使領賀州刺史從征劉崇轉虎捷右廂都指揮使領本州團練使兼行營步軍都指揮使軍至河內周主意在速戰令晁倍道兼行晁私語通事舍人鄭好謙曰賊勢方盛未易敵也宜持重以挫其銳好謙以所言入白周主怒曰汝安得此言必他人所教言其人則舍爾不言當死好謙懼遂以實對周主即命晁械於州獄軍迴始赦之及征淮南改虎捷左廂領閬州防禦使充前軍行營步軍都指揮使又為緣江步軍都指揮使時李重進敗吳人于正陽以降卒三千人付晁晁一夕盡殺之周主不之罪壽春平拜檢校太傅未幾以疾歸京師卒晁好聚斂處方鎮以賄聞以周初與宋祖之父分掌禁軍有宗盟之分故宋祖常優禮之再加贈典焉

宋史論曰王景革微時或至爲盜負薪遭五代之亂奮身戎功重  
據邊要宋興稽顙北嚮太祖待以誠信宜無不自安者景趨利改  
圖乃至滅族王晏郭從義遷怒肆忿誣人以死侯章在藩邸有剝  
下之名薛懷讓趙鼎爲將皆忍於殺降斯皆亂世之習有不能盡  
去者

卮言曰王景以下諸將皆漢晉以來藩鎮之表表者也雖朝代累  
遷而顯位不失雖方鎮更徙而兵權不移蓋其雄據足以自恃而  
觀變足以自全此數人者謂之大將則無輔世之功名謂之強藩  
則無抗衡之才畧爲將則不仁爲臣則不敬誠亂世之積習武夫  
之伎倆耳故并見于此篇宋初諸藩猶蹈世襲太祖漸削其權以  
革其弊而向之倔強不可制者皆稽首請命况庸庸者哉



